

جریدہ عدلیہ

برنجی سنہ ۵ کانون اول ۱۳۲۵ جمعہ ایرتسی نومرو: ۱

مقدمہ

بر ہیئت اجتماعیہ نك قوۃ عدلیہ سندن مقصد، اول ہیئت ایله انی ترکیب ایدن افراد ملتک حقوق عمومیہ و شخصیہ سنی تحت تأمینہ الملق قضیہ سی اولدینی و شو امانیہ نك حیز آرای حصول اوله بیلمسی احکام قوانینك حسن جریان و تطبیقنه متوقف بولندینی حالده دور مشنوم استبدادك قوای عمومیہ دولته ایقاع استبدیکی تأثیرات الیمه نك نتایج مؤسسه سندن اولمق اوزره معاملات عدلیہ دخی محور قانونیده جریان ایدمه مدیکندن حقوق عمومیہ و شخصیہ یی محافظه عائد و سائط قانونیه توسل، عادتاً درجه استحاله یه تقرب ایتمش و قوۃ عدلیہ مزك معکس شئونى اولان جریده محاکم عدلیہ ده علی العاده و غایت بسیط دعاوی یی متضمن اعلامات و بر قاچ سطر اعلاناتدن عبارت اولمق اوزره نشر ایدلمکده بولنمش ایدی . المنة لله مشروطیت مشروعه مزك اعلانی هر شعبه اداره کبی اداره عدلیہ مزك دخی مطلوب اولان درجه انتظام و تکملنه عائد و سائلک استکمالنی ایجاب ایتدیرمکه بر طرفدن عدلیہ تنسیقاتنك و دیگر جهتدن دخی محاکم لازمه تشکیلاتنك اجرا و احتیاجات حاضرہ مزه موافق قوانین جدیدہ تنظیمی مثللو لوازم معدلتك ایفا اولندینی شو صروده دور جلیل عدلیہ مزك ایجابات عالیہ سیله متناسب و عمومك استفادۃ کلیه سنی موجب اوله بیله جك بر طرز بهین و نوین اوزره و (جریده عدلیہ) نامیله بر جریده موقوتہ نك طبع و نشری عدلیہ نظارتجه تقرر ایلدی .

جریده عدلیہ نك مندرجاتی ، رسمی و غیر رسمی اوله رق ایکی قسمه تفریق اولنمشدر . قسم رسمیهی محکمه تمیزك تفسیر قوانینه متعلق اعطا ایدمکجه مقررات مهمه ایله اصول محاکمه و تطبیقات قانونیه عائد اعلاماتی و مراجع مخصوصه سندن صادر اولان اداری و قانونی تبلیغات و سائر رسمی معاملاتنی احتوا ایدمکجه کبی قسم غیر رسمیهی دخی مسائل جلیله فقیه و هر کونه احوال و ترقیات حقوقیه دائر مباحث علمیہ و مهره متخصصین حقوقك مقالات و هر نوع مسائل حقوقیه و مواد قانونیه اوزرینه تفسیر علمی صورتیله واقع اوله جق مطالعات مفیده لری و اجانبك مؤسسات و علوم حقوقیه سی حقنده معلومات و ایضاحات مکملہ یی محتوی بولنه جقدر .

جریدہ نك قسم رسمی بی تشکیل ایدن مندرجاتی و بالخاصه محكمه تمیز هیئت محترمه نك تفسیر و تطبیق قانونه متعلق مقرراتی بتون محاکم عثمانیه ایچون حالات مماثلده توحید تطبیقاتی مستلزم بررهبر تبعات و تدقیقات اولوق اعتباریله عموم محاکم مأمورلرینه فوائد عظیمه تأمین ایدم جکی کبی قسم غیر رسمی بی ترکیب ایدن مقالاتك دخی مأمورین عدلیه و منتسبین علم حقوقه زیاده سیله فائده بخش اوله جنفی شبهه سزدر .

مسائل فقهیه و حقوقیه و جزائییه و تجاریه حقنده سائر ارباب حقوق طرفدن دخی کوندریله جك مقالات علمیه مع الافتخار درج و منتسبین حقوقك مسائل فقهیه و تعیین معناسنده تردد ایلدکلی مواد قانونیه اوزرینه وقوع بوله جق استیضاحلری در حال نظر دقته الهرق حل مسئلهیه غیرت ایدیله جکدر . الحاصل جریده عدلیه نك مقصد و موضوع مشروح اوزره قارئلرینك جداً استفادہ سنی کافل بر مرتبه مکملیتده دوام انتشاری نهیه متوقف ایسه توسل اولنق مقرر بولندیغندن حصول موفقیت الطاف سبحانیه دن مأمول و مستعدادر .

و سائله الترفیه



قسم رسمی

عدلیه مفتشلرینك وظائفی و درجه صلاحیتی مبین اولوب مرعیت احکامنه اراده سنی جناب پادشاهی شرفتملق بیورلدینی باتذکره سامیه اشعار اولنان تعلیماتك اسباب موجبہ سنی حاوی عدلیه نظارتندت جلیله سندن مقام صدارته یازلمش اولان تذکره صورتیدر :

حکامك تقدیر و قایعله تطبیق قوانینده حائز اولدقلى نفوذ و استقلاللرینه مقابل بو نفوذ و استقلالك حقوق افرادہ بر تعدی تشکیل ایتمه سنی ایچون کنديلرندہ وظیفه و مسئولیت حسنی تولید ایدم جك بر مراقبه جدیه نك لزوم وجودی آزاده عرض و ایضاحدر . هر نه قدر امور عدلیه سنی متکمل و جداً قانون شناس و وظیفه پرور حکامه مالک اولان یرلرده بو نوع تشکیلاته احتیاج حقیقی کوریلہ مزسده هنوز ربع عصری انجق اكمال ایدن تشکیلات عدلیه عثمانیه نك درجه مطلوبه تکمله وصولی ادعا اولنہ میه جغندن بشقه حائز اولدقلى وظیفه حقیقه اهل عد ایدیلہ جك حکامده چوق کره تصادف ایدیلہ میه جکندن مملکت مزده بو نوع تشکیلاته احتیاج صحیح موجود اولدینی قابل انکار اوله ماز .

باخصوص مجلس عمومی نك تصدیقته اقراران ایدن تشکیلات عدلیه و بودجه قانونی ایلہ نظارت عاجزی یه بخش اولنان صلاحیتہ استناداً ممالک عثمانیه نك جهات مختلفه سنده بک چوق محاکم جدیدہ احداثیلہ یکی مأمورلر و حاکملر تعیین اولنمش و بونلردن قسم اعظمی علم حقوق تحصیلنی هنوز اكمال ایدن بر طاقم کنجلردن عبارت بولنمش اولدیغندن بونلرک تطبیقات قانونیه نه درجه موفقیت کوستره جکلری یقندن تدقیق اولنہ رق معلومات صحیحہ اکتساب ایدمک ضروریدر . بناء علیه ۳۲۵ سنه سنی بودجه قانوننك مساعدہ سندن بالاستفاده روم ایلی ولایات ثلثه سنه مخص اولان آلتی مفتشلكك مرکزہ نقلیه بر هیئت تفتیشیه تشکیلی و ولایات مذکورہ کافی السابق متاد یا تحت مراقبهده بولندیلمق اوزره ولایات سائرہ دن استثنائیتك رفعلیه کیفیت تفتیشك در سعادت و بالجمله ولایات عثمانیه یه تشمیلی مناسب مطالبه قلمش و اولبابده سبق ایدن عرض و استیذان چا کرانہم اوزرینه اراده سنی جناب پادشاهی شرفتملق بیورلمش ایدی .

مفتشلك محاکم و دوائر عدلیه یی ضرورت تفتیشلرینه متعلق اوله رق الدہ موجود بولنان تعلیمات ناقص و استحصال مقصده غیر کافی کورلمش اولدیغندن بو صورته تشکیلی اجرا قلمش اولان هیئت تفتیشیه مرکزیه نك ایفاسیله مکلف اولدقلى وظائف تفتیشیه یه متعلق یکیدن قلمه انسان تعلیمات ورقه سنی، تصویب عالی، ملوکانه یه اقراران ایدیرلمک اوزره مربوطاً مرض و تقدیم حضور سائی جناب صدارت پناهیلری قلمشدر .

تعلیمات مذکورہ مطالعه سندن رهین علم عالی اوله جنفی اوزره مفتشله تودیع اولنان صلاحیت

تفتیشیہ ایک نقطہ مہمہمہ خلاصہ اولہ بیلور کہ اودہ محاکم و دوائر عدلیہہ حکم قانونک تمامیلہ جریان ایدوب ایتدیکی و حکام و مأمورینک اخلاق و مشواری شایان امن و اعتماد اولوب اولدینی خصوصلریدر . فی الواقع بر حاکمک اخلاق و مشواری نہ مرتبه متین و جالب اعتماد اولورسه اولسون حسن توزیع عدالت امرندہ وضع ایدلش اولان احکام قانونیہ تمامیلہ تنفیذ و تطبیق اولندجہ معاملات و مقرراتک سلامتہ حصول امنیت متعسر اولهجنی کی حاکمک اخلاق و تمایلاتی صفت حاکمیتک بخش ایتدیکی شرف و حیثیتہ متناسب اولندجہ نظر خلقدہ محکمہک عدالتہ اعتماد متعذر اولهجنندن بو ایکی نقطہک یعنی حسن تطبیق قانون ایلہ حسن مشوار حاکمیکدیگری اتمام ایدن لازم غیر مفارق قیلندن اولدینی شبهہدن آزادهدر . بناء علیہ تعلیمات مذکورہک بتون محتویاتی بو نقاطک تفصیلات و تفرعاتک ذکر و ایرادیلہ مفتشیرک صلاحیت تفتیشیہلرینک تعینندن عبارت بولمشددر . انحق حق تفتیشہ مقابل بر درجہہ قدر حق انفاذ و اجرانک وجوب وجودی تفتیشک مؤثر و نافذ اولسنک مقتضای طبیعی اولغلہ مفتشیرک تصادف ایلدکبری احوال و معاملات اوزرینہ حائر اولملری لازم کلن صلاحیت مسئلہسی پک مهم کورلش اولغلہ اثنای تفتیشده قانوناً ایفاسی ضروری معاملاتک ایفا ایدلدیکی و یا نقصان و یا یاکلش ایفا قلندینی کورلدکده بو معاملاتک ایفاسی و تصحیح و اکالی و خطیئات واقعہک عدم تکرری حقندہ اخطارات و وصایاده بولنقی و مرتبہ اولی مأمورلرینک دوام مأموریتلری محذوردن غیرسالم کورلدکده ایشدن ال چکدیریلهرک یرلرینہ دیکرینک انتخابی خصوصی محلی انجمنلرینہ اشعارایدلک و حکام صنفیلہ ارادہ سنیہ ملوکانه ایلہ منصوب مأمورینک داعی مؤاخذه و مسئولیت احوال و معاملہلری وقوعندہ نظارت عاجزیہ بیان معلومات ایدلک و شو قدر کہ بونلرک مأموریتلرندہ دوامی دخی داعی مخاطره کورلدکده ایشدن ال چکدیریلسی خصوصی نظارت عاجزیہ اشعار اولنقی کی بعض صلاحیت اعطاسی مناسب مطالعہ اولنهرق تعلیمات مذکورہہ درج ایدلشددر .

فی الحقیقہ تشکیلات جدیدہ مناسبیتیلہ یکی تعیین اولنان مأمورلر ایلہ احکام قانونیہہ تمامی و قوقلری ادعا ایدیلہمیهجک اولان بعض اوافق مأمورلرک بر مقصد و نیته مبتنی اولیان خطا و ذہوللرندن طولانی مؤاخذهلری مقارن حق اولهمیہجفندن بونلرہ ایلک دفعہلری ایچون اخطارات و وصایا اجراسیلہ تصحیح خطالریہ اہتمام اولنسی لازمہ مصلحتندن اولدینی کی عامہ ناسک حکومتدن اجراءات و فعالیت انتظارندہ بولندینی شو صرہہ بر مجلدہ پک فاحش بولسزلقلر و سوء استعماللر ایلہ عدم خشنودی عمومی جالب ایتش و سوء استعمالاتی بارز و ظاہر بولنش اولان بر مأمور حقندہ مفتشک بعدالتحقیقات الی باغلی قالہرق هیچ بر معاملہ ایفا ایتکسزین قالقوب کیتسی انتظار عامہدہ تفتیشک نفوذ و تأثیرینی احما ایلہ حکومتک کافی السابق عطالت سیاستنی تعقیب ایتکده اولدینہ ظن و یقین حاصل ایتدیرہرک اجراءات جملہ حکومتدن یأس تولید ایتدیرہمیهجکی کی اولیادہکی اوراق اوزرینہ بر قاپچ آی صکرہہہ قالمسی محتمل اولان معاملہ دخی بونی تضمین ایدہمیهجکی درکار اولغلہ بومثللو احوالہ مفتشک درحال او مأموری ایشدن ال چکدیرہرک و یاخود مرتبہ ثانیہ مأمورلرندن ایسہ بو خصوصی نظارت عاجزیہ اشعار ایدرک ہان

اجراءات و فعالیت کوسترلسی ہم حکومتہ قارشی اعتماد عمومی ناسک استیجابنہ ہمہدہ مأمورینک و هیأت عدلیہک صلاح کاملنہ بیوک و مؤثر بر خدمت اولهجنی طبیعی بولمشددر . بناء علیہ تعلیمات مذکورہک نزد سائی صدارتپناہیلرندہ قرین تنسیب بیورلدینی تقدیردہ ہان تفتیشاتہ باشلا تیدرلق اوزرہ عرض عتبہ علیای ملوکانه قیلنهرق ارادہ سنیہ جناب پادشاهی ایلہ بالتوشیح نظارت عاجزیہ اعادہ بیورلسی بابندہ .

عدلیہ مفتشیرینک وظائفی و درجہ صلاحیتنی مبین تعلیماتنامہ صورتیدر

احکام عمومیہ

برنجی مادہ — با ارادہ سنیہ عدلیہ نظارتندہ متشکل ہیئت تفتیشیہ مرکزیہ بی ترکیب ایدن مفتشیر، لزوم کورلدکجہ یا بالذات عزیمت ایتک و یاخود معاونلرینی اعزام ایتک صورتیلہ در سعادت و ولایات عثمانیہدہ کافیہ محاکم و دوائر عدلیہ معاملاتی و مکاتب حقوقیہ ایلہ وکلای دعاوی بی دائمی بر تفتیش و مراقبہ آلتندہ بولندیرہجکلردر .

ایکینچی مادہ — مفتشیر عزیمت و عودتلری ایچون اصولنہ توفیقاً خرج راء آلہجکلردر .

اوچینچی مادہ — مفتشیر ایلہ معاونلرینک یدلرینہ برر ورقہ اعتمادیہ ویرلش اولدینندن ایجاب ایتدکجہ بونی ارانہ ایلہ اثبات هویت ایلہجکلردر .

صورت تفتیش

درنجی مادہ مفتشیر بروجہ آتی موادک تدقیق و تحقیقہ اعتنا ایدہجکلردر : اولاً محاکمک معاملات قلمیہسنہ عائد اولق اوزرہ کاتبلر و مباشرلرک اخلاق و اہلیتلرینی وایشلرینہ صورت دواملرینی و دعوتیہ ورقہلرینک طرزتنظیم و تبلیغی و دفاتر قانونیہک قیود و شرائط لازمیہ جامع بر صورتدہ و دعوی ضبطلرینک شبہہ تغیر و تحریفدن عاری و جالب امن و اعتماد بر طرززدہ طوتیلوب طوتلمدینگی و ہیئت محکمہک امضاسی تحتندہ کی اساس ال ضبطلرینک ہمہ حالی محافظہ قیلنوب قیلنمدینگی و اوراق محکمہک حسن محافظہسنہ وبالخاصہ ہر دوسیہک محتویاتی متضمن اقتضا ایدن ملفوفات پوصلہسنک تنظیمنہ و بردوسیہدہ موجود اوراقدن ہر برینک صرہ ایلہ نومرو تحتہ آلمسنہ اعتنا ایدیلوب ایدلدیکی و قرارلرک کونی کونہ قرار دفترینہ نقلیلہ امضا ایتدیرلسی و اعلاماتک وقت و زمانیلہ تنظیم و اعطاسی خصوصنہ اہتمام اولنوب اولنمدینگی و الحاصل بالجملہ معاملات قلمیہ ایلہ بونلرک اصحاب مصالحہ قارشو نہ یولدہ معاملہدہ بولنقدہ اولدقلرینی تحقیق و تفتیش ایدہجکلردر .

بوندن بشقه مفتش هر قلمك كنديسنه مخصوص استايتس قلمی تنظيم ايتديره جكلر و بواسايتس قلمك حقایق و وقایع شدت مطابقتلری و کمال وثوق و محترری تأمین ایدہ جك تدایین اتخاذ ایدہ جكلر در .

بشنجی ماده — نفس محكمه عائد اولق اوزره رئیس واعضائك اخلاق و اهلیتلی و درجه دواملری و محكمه نك امور داخله نك صورت جریانی و كته و مستخدمین ايله رئیس واعضايتینده کی مناسبانك شكلی و امر محاكمه و مذاکره احكام قانونیه رعایت ایدیلوب ایدلدیكنی و محكمه دن صادر اولان حكمكرك قانونه درجه مطابقتی و علل و اسباب قانونیه بی جامع اولوب اولدیغی و قرارلرك بالذات رئیس محكمه طرفدن تنظیم اولنوب اولدیغی و محاكم استینافیه ده راپورتورك وظیفه نك بحق ایفا قلوب قلمدیغی و محكمه جه ایشلرك سرعت و انتظام و حقانیتله تسویه ایدیلوب ایدلدیكنی تدقیق و تفتیش ایدہ جكلر در .

التنجی ماده — مدعی عمومیلر ايله مدعی عمومی معاونلرینك اهلیت و اخلاق و اقداملری و تعقیبات جزائیه ده سرعت و موفقت کوستروب کوسترمدکلینه و نزدلرنده مدت قانونیه سندن زیاده طوتلش اوراق و حقوق عمومیه به متعلق موآددن مرور زمانه اوغراتیلش ایشلر بولنوب بولمدیغنه و مستنطقلرك تدقیقاتنده نقصان و یا توقیف و تخلیه و منع محاكمه کی قرارلرنده یولسزلق کورنجه اكمل و اصلاح معامله اسبابه توسل ایدوب ایتدکلینه و معاملات اجرائیه به نظارت وظیفه سنده تکاسلری بولنوب بولمدیغنه و حبسخانه و توقیفخانه ايله مقاولات محررلکی اموری احكام قانونیه به توفیقا تفتیش ایلوب ایتدکلینه و محاکدن صادر اولان یولسز برأت قرارلری علینده طرق لازمه به مراجعت ایدوب ایتدکلینه و احكام ابتدائیه حقنده قضا مدعی عمومیسنك لوا مدعی عمومیسنه و لوا مدعی عمومیسنك ده ولایت استیناف مدعی عمومیسنه و یرمسی لازم کلن معلوماتی و یروب و یرمدکلینه و الحاصل نزدنده بولندقلری محكمه ده احكام قانونیه نك حسن جریان عائد حق نظارتلری بحق ایفا ایدوب ایتدکلینه و اعلامات جزائیه مصارف محاكمه سیله جزای نقدیلرك استیفاسنه دقت ایدوب ایتدکلینه دائر تفتیشات اجرا ایلله جكلر در .

یدنجی ماده — استنطاق دائرلرنده مستنطقلر ايله مستخدمین سائر نك اخلاق و اهلیت و درجه دواملری و معاملات تحقیقه ده سرعت و عدالت التزام ایدیلوب ایدلدیكنی و جلب ایدیلان شهودك وقت و زمانیه استماع اولنوب اولمادیغی و دلائلك جمع و ضبطنده و حقیقتك كشف و اظهارنده موفقت کوستریلوب کوسترمدکلی و مرور زمانه اوغراتیلان ایشلر بولنوب بولمادیغی و تخلیه و توقیف معاملاتنده و لزوم و منع محاكمه قرارلرنده یولسزلق یا ییلوب یا بلیغی تدقیق ایدہ جكلر در .

سکزنجی ماده — اجرا دائرلرنده مأمورینك لیاقت و اخلاقلریله صورت دواملرینه و اجرا معاملاتنده سرعت و حقانیتله حرکت ایدیلوب ایدلدیكنه و مزایدلر ايله اجرا مقرر اتنده احكام قانونیه به و لوازم عدالت رعایت اولنوب اولمادیغنه و اعلامات جزائیه تحصیلاتنده فعالیت و اعتنا کوستریلوب کوسترمدکلینه و بونلردن مرور زمانه اوغراتیلش ایشلر بولنوب بولمادیغنه دائر تفتیشات ایفا ایلله جكلر در .

طقوزنجی ماده — مقاولات محررلکلرنده مأمورینك اخلاق و اهلیت و دوام نقطه نظرندن حائر اولدقلری

اوصافی و دفاترك صورت قید و حفظی و معاملات جاریه نك امنیت بخشا بر طریق سالم تعقیب ایدوب ایتدکلی و وظائف تصدیقه نك ایفا سنده و خرجلرك استیفاسنده اصحاب مصالحه کوستریلان طور و حرکتده شایان موآخذہ برشی اولوب اولمادیغی تدقیق ایدہ جكلر در .

اونجی ماده — ضابطه عدلیه مأمورلرینك اخلاق و اقتدارلری و جهت عدلیه به متعلق خصوصات تنفیذیه ايله معاملات تبلیغیه بی و تحقیقات ابتدائیه وظائفی حسن ایفا ایدوب ایتدکلی و اغماض عین ایتدکلی و یا سورونجمده بر اقدقلری ایشلر بولنوب بولمادیغی تحقیق ایدہ جكلر در .

اون برنجی ماده — حبسخانه و توقیفخانه لر مأمورینك اهلیت و اخلاقلریله موقوفین و محبوسینه قارشو معاملهلری و یولسز توقیف و یا تخلیه و قوع بولوب بولمادیغی و حبسخانه و توقیفخانه لر نظامات داخله سینه دقت ایدیلوب ایدلدیكنی و بونلرك حفظ الصحه به موافق و اشخاص موجوده بی استیعابه کافی اولوب اولمادیغی تدقیق ایلله جكلر در .

اون ایکنجی ماده — محكمه تمیزه کوندریکی حالده آتی آی ظرفده جوابی کلیان اعلاماتك لیستہ سنی تنظیم ایتدیره رك برای تسریع نظارته اعطا ایلله جكلر در .

اون اوچنجی ماده — دعوی و کیللی حقنده و قوعبوله جق شکایات اوزرینه منتظم بارو متشکل بولنان یرلرده بارونك نظر دقتی جلب ايله تعقیب معامله ایدہ جكلر و بارو بولنمان یرلرده بالذات تحقیقات اجرا و نتیجه سنی تعیین ایلله جكلر در .

اون دردنجی ماده — مکاتب حقوقیه ده معلملرك اقتدار و اخلاقلرینه و كرك معلمینك درجه دوام و اقداملرینه و امتحانلرك بحق و تحصیل مکملی تأمین ایدہ جك صورتده اجرا ایدیلوب ایدلدیكنه و تدریسات یومیه نك انتظام و نتیجه اعتباریله موافق مطلوب اولوب اولمادیغنه دائر تفتیشاتده بولنه جقلر و امتحانلر ايله درسلرده حاضر بولنوب طلبه نك درجه تحصیل حقنده ایراد سؤال کی و سائطله بر فکر صحیح ایدینه جكلر در .

اون بشنجی ماده — مفتش هر بولندقلری یرده اك بیوك عدلیه مأموری صفتی حائر دلر و بلا واسطه عدلیه نظارتیه مخبره ایدرلر .

اون آلتنجی ماده — اثنای تفتیشده تبین ایدہ جك احوال اوزرینه مفتش احكام قانونیه نك حسن جریان و تطبیق امرنده هر دلرلو اخطارات و وصایاده بولنه جقلر و ایجابی حالده درجه اولی مأمورلرینه ایشدن ال چکدیرمرك یرلرینه دیکرینك تعیینی ایچون محللری انجمن عدلیه سینه تبلیغات اجرا ایدہ بیله جكلر در . درجه ثانیه مأمورلریله با اراده سینه تعیین اولنان دیکر مأمورین عدلیه حقنده ده نتیجه تحقیقاتلرینه کوره اجرایی لازم کلن معامله بی نظارته اشعار ایدہ جكلری کی ضرورت قطعی و وجودنده ایشدن ال چکدیرملرینی با تلعرف نظارتدن استیذان ایدہ بیله جكلر در .

اون یدنجی ماده — مفتش محاکم كرك محاکمات علنیه و خفیہ سنده و كرك مذاکراتنده حاضر بولنه رق رایہ قاریشمقسرین تفتیشاتده بولنه بیله جكلر در .

اون سکرنجی مادہ — مفتشدر ولایت انجمن عدلیہ سی معاملاتنی تدقیق ایله انتخاباتک اصولنه توفیقاً جریان ایدوب ایتمدیکنی دخی تفتیش ایدم جکلردر .

اون طقوزنجی مادہ — وظائف تفتیشیه متفرع ایشلر حقنده استدما قبولنه مفتشدرک صلاحیتی واردر . یکرمنجی مادہ — مفتشدر طرفندن محللری انجمن عدلیه لینه ویا مأمورین عدلیه انتظام معامله حقنده وقوعو لاجق تبلیغات و اخطاراتک احکامی مفتشک تعیین ایدم جکی مدت ظرفنده بهمه حال اجرا وتنفيذ اولنه جقدر .

یکرمی برنجی مادہ — مفتشدر هیئت عدلیه حقنده خارجاً دخی تحقیقات اجرا ایدم رک اهالیدن استطلاعات واستخباراتده بولنه جقدر وکافه احوالده اداره عدلیه نک محافظه وقع وحیثیتی واهالینک جهت عدلیه قارشو استجواب اعتماد وامینیتی مطمح نظر اتخاذ ایله جکلردر .

یکرمی ایکنجی مادہ — بالجمله محاکم ودوائر عدلیه جریان ایدن هر نوع معاملاتده دائر تنظیم اولنه جق نمونه توفیقاً ایکی آید بر کره تفصیلات وایضاحات لازمی جامع جدوللر ایله تسهیل مقایسه خدمت ایدم بیلجک فصللری حاوی استانیستیفیلر هیئت تفتیشیه کوندیرلرک شو صورتله عموم معاملات عدلیه بر مراقبه دائمه مرکزیه تختنده بولندیریله جقدر .

یکرمی اوچنجی مادہ — معاونلر طوغریدن طوغریه مفتشدرک امر وتعلیماته تابع اولوب کندیلری خود بخود حرکت مآذون دکلردر . و منحصرأ مفتشدر طرفندن ویریله جک صلاحیت دائره سنده ایفای وظیفه ایله جکلردر .

یکرمی دردنجی مادہ — مأمورین ورؤسای محلیه مفتشدرک ومعاونلرینک وظیفهلرنده موقتیلرینی تسهیل ایچون هر درلو معاوننده بولمغه مجبوردرلر .

یکرمی بشنجی مادہ — مفتشدر معاملات واجراآت وتفتیشات واقعملری نتایجندن عدلیه نظارتنه قارشو مسئولدر . فی ۱۶ ذی القعده ۳۲۷ سنه و فی ۱۶ تشرین ثانی ۳۲۵ سنه

تبلیغات محرمه

عدلیه نظارتندن بالعموم ولایات استیناف مدعی عمومیلکلیله الویة مستقله مدعی عمومی معلولکلیله فی ۱۱ تشرین ثانی سنه ۳۲۵ و فی ۱۱ ذی القعده سنه ۳۲۷ تاریخنده یازیلان تحریرات عمومی صور تیدر:

۱۰ تموز سنه تاریخندن اول ارتکاب ایدلمش اولان جرائم عادیهدن جنایات افعالیله محکوم اولوبده مجازات محکومهلرینک نصفی اکال ایدنلرک اولوب ایدم کی قانون حکمنه توفیقاً تخایه سبیللری وحقلرنده کی اعلاماتک تمیزاً تدقیقنده بر فائده قانونیه متصور اولمادینی جهتله بوقیل اوراقک محکمه تمیزه ارسال اولنامسی

لزومی مقدما تعمیماً از بار قلنمشدی . تاریخ مذکور دن اول ایقاع جرم ایدن واوراق حکمیهلری تدقیقات تمیزیه اجرایی ایچون کوندیریلوبده هنوز نتیجه تدقیقات تمیزیه سی محللرینه بیلدیرلماش ویا خود حقلرنده کی احکام جزائیله محکمه تمیزجه اخیراً تصدیق قلنهرق اعاده ایدلمش اولان جنایات عادیه افعالیله متهم وقانون مذکورک بشنجی مادہ سنده کوسترلیدیکی وجهله اعدام ومؤبد کورک ومؤبد قلعه بندلک ونفی ابد جزالریله محکوم اولوب مدت جزائیهلری اون بش سنه تحویل اولنانلر حقلرنده بر موجب قانون معامله ایفا اولنلق اوزره بولنلر دن ماعدا مجازات موقتهیه محکوم اشخاصدن نصف مدت جزائیهلرینی اکال ایدنلر اولدینی حالده انلرک دخی هان تخلیهلری اقتضا ایدم جکی درکار ایسده بولنلر دن هنوز تدقیقات تمیزیه سی در دست بولنانلرک تدقیقات نتیجه سنه تعلیقاً حال محبوسیتده بولندیرلرینه وحکملری تمیزاً تصدیقه اقرارن ایدنلر حقلرنده دخی یا کلش بر معامله یه محل قلامق و تدقیقات تمیزیه نتیجه سی نقض دخی اولسه تکریر محاکمه حاجت قلمدینی معلوم اولوق اوزره کیفیتک تعمیماً تبلیغی باش مدعی عمومیلک مأموریت بهمه سندن بوکرده باتذکره از بار اولنشدر . احوال مبسوطده بصورتله ایفای معامله اولنسی بیان اولنور .

عدلیه نظارتندن بالعموم استیناف مدعی عمومیلکلیله الویة مستقله محاکمی رؤسانه فی ۲۱ ذی القعده سنه ۱۳۲۷ و فی ۲۱ تشرین ثانی سنه ۱۳۲۵ تاریخنده تسطیر اولنان تحریرات صورتیدر :

محاکم نظامیهدن صادر اولوب تمیزی استدما اولنان اعلاماته متفرع اوراق تمیزیه نک مذاکره صالح بر حاله کلی برطاقم شرائط قانونیه تابع اولدینی وبوقیل اوراقک طشره محاکمه حین اعطا ومحکمه تمیزه اسراسنده محکمه باش کاتبلریله محاکم رؤسانک ایفاسنه مجبور اولدقلری وظائف دخی قانوناً معین بولندینی حالده محاکم رؤسا و باش کاتبلرندن بعضیلرینک بو باده کی وظیفه قانونیهلرینی لایقوله ادراک و ایفا ایتماملری بهوده محارباتی وبوده برچوق اوراقک جواب نتیجه سنه تعلیقاً تراکمی موجب واصحاب مصالحک ایشلرینک سورنجمده قلمسنی مستلزم اولمده در . بو جله دن اولهرق اصول محاکمه حقوقیه قانوننک تصحیح قراره متدائر ایکی یوز الی ایکنجی مادہ سنک تعدیلندن اول تمیزاً طرفین محکمه دعوت اولنهرق تصحیح قرار وقوعندن خبردار اولدقلری خالده اخیراً مادہ مبحث عنهانک بالتعیدیل اوراق اوزرینه تدقیقات تمیزیه اجرایی قبول اولنمسیله بو باده کی حقوقک فوت اولدینی تأمل اولنوب بعدما تصحیح قرار طلبنه دائر ویریله جک عرضحال صورتلرینک دیگر طرفه تبلیغی ایله برهفته ظرفنده جواب لایحه سی ویرلیدیکی حالده قیدی و تبلیغیه خرجلرینک بش لیرا جزای نقدیسیله محکمه تمیزه کوندیرلمسی طشره محاکمه ویریله جک تمیز عرضحاللری ظهیرینه مدت تمیزیه نک حساب وتعیینی بحثده تمیز اولنان اعلامک مستدعی تمیزه هانکی تاریخده تبلیغ اولندیغنک و اوراق تمیزیه نک هانکی تاریخده اعطا ایدلیدیکنک بیلنمسی مقتضی اولدینی جهتله تاریخ تبلیغ ایله یوم اعطانک محکمه باش کاتبلری طرفندن بهمه حال اشارت اولنهرق زیرینک محکمه مهری و باش کاتبک امضاسیله تصدیق و بو مقوله اوراقک تبلیغیه و قیدی خرجلری میز علیک رؤس وعددینه کوره تخالف ایدم جکندن مذکور خرجلرک حین استیفاسنده بو جهتک نظر دفته آلمسی و اکثراً ربع خرجلر

محکم بہک مقداری اوزرندن بالحساب اخذ و ارسال اولتقدمہ و بوسیله خرج تعرفہ سنک طقوزنجی مادہ سنہ مخالف اولہرق بعضاً بش غروشه قدر ربع خرج کوندریلہرک بودہ نقصانک اکالی امرندہ پیودہ مخبراتی انتاج ایلمکدہ اولدیغندن مذکور خرجلرک اصول و قانونہ توفیقاً الہرق ارسالی و تمیز خرجلری مقبوض سندلرینک اولبالدہ کی تحریراتہ لفی و مقدار خرجک درجیلہ اخبارنامہلرک دخی ہان با پوستہ ارسالی و تاخیر اجرا علم و خبری طلب اولندیفی تقدیردہ خرجی اولان یکریمی بش غروشلہ برابر کوندرلیمان ایکی غروشلق مقطوع و یکریمی بارہلق مقبوض پول بدلتک تسیاری و بمضامستدعی تمیزک خلاف قانون اولہرق تمیزایچون عہدہ تصرفندہ بولنان اموال و املاکی قارشولق کوسترہرک کندولرینی کفیل ارانہ ایتدکلری اولبالدہ کی کفالتنامہلر مندرجاتندن اکلشلمقدمہ اولسلیہ بعدما بویولدہ خلاف قانون ویریلان کفالتنامہلرک محللری مقاولات محررلکلرنجہ تصدیق ورؤسای محاکم طرفلرندن قبول اولہرق کوندرلیوب تمیز ایدن طرفہ بو خصوص خلاف قانون اولقلہ محکمہ تمیزجہ رد ایدیلہرک متضرر اولہجقلرینک اخطار اولنسی واوراق تمیزیہیہ وضع والصاقی مقتضی پوللرک مقدار قانونیسنہ ونوع مخصوصنہ موافق صورتدہ الصاق و ابطال ایدلسی وجبلبنان متصرفلیغیلہ بیروب سوریه ولایتلرندن عربی العبارة کوندریلان اعلاماتک بعضاً ترجمہ خرجلری کوندرلما مکملہ برابر کوندرلسہبیلہ بوراجہ ترجمہسندہ مشکلاتہ تصادف ایدلمکدہ اولسی جہتلہ بعدما بو مقولہ اعلاماتک محللرنجہ بعدالترجمہ مصدق صورتلرینک ارسالی لزومی محکمہ تمیز حقوق دائرہسی ریاستندن بامذکرہ افادہ اولنمش و افادہ واقعہ نظارتجہدہ موافق کورلمش اولغلہ بعدازین احوال مسرودہدہ منتج مخبرات اولہجق بر معاملہیہ قطعاً میدان ویرلامسی خصوصاتنہ مستمراً دقت و اعتنا اولنسی و ادارہ مصلحت نامی آلتندہ برطاقم احوال لاقیدانہ و معاملات قانون شکنانہ میدان ویرمک مسلك سخیفندن ارتق ابدیاً و جدآ توقی ایدلسنک و تنبیہات واقعہ دائرہسندہ ایفای معاملہ ایتیمان محاکم باش کاتبلرینک مسئولیتلری قطعاً مقرر بولندیغنک ایجاب ایدنلرہ تبلیغی لزومی تعیماً بیان اولنور.

درسعادت محاکم حقوقہسندن اجرا اولنان تبلیغات ایچون اصحاب دعاویدن آلمان اجورات مباشریہنک غیر منتظم و غیر مطرد بر صورتدہ التقدہ ایدوکی اخیراً عدلیہ نظارت جلیلہسنجہ نظر دقتہ آلہرق ہم مباشرلرک اصحاب مصالحدن هیچ برنام ایلہ پارہ آلہماملرینی تأمین و ہمدہدرسعادت و جواروی ایچون آلہجق اجوراتی توحید ایلمک اوزرہ محاکم مذکورہیہ توزیع اولنان تعرفہ صورتیدر :

حقوقہ متعلق اجرت مباشریہیہ دائرہ خرج تعرفہسی

مجیدہ
یکرمیدن
پارہ غروش

- ۵ قبان دققدن بدآیلہ زیرک یوقوشی، چینلی حمام، دستکاهجیلر جادہسندن، خورخور، اقسرای جلا دچشمہسی، یکی قبویہ قدر محلات داخلی .
- ۷۲۰ کسمہ قیادن بدآیلہ دارغمان، زنجیرلی قیو، خرقتشریف، معمارسان، قلندر، چقور بوستان، یکی محلہ عیسی قیوسی صاتیہیہ قدر .

- ۱۰ حمیدہ قریہسی، رامز قشلہسی مالٹہ، طوبجیلر، اوطاقجیلر، طاقیہجی، مرکز افندی، بالقلی روم و ارمنی اسپتالیہلری .
- ۱۰ غازی چشمہ، زیتون برونی، داود پاشا قشلہسی، چرپیچی، ولی افندی، چویان چشمہسی، یکی کوی، فرہادپاشا چفتلکنہ قدر .
- ۱۰ چورکلک، عزب قپوسندن، قاسم پاشا، خاصکوی، سودلیجہ، قرہ آغاچہ قدر اولان سواحیل بوی .
- ۱۵ چویان چشمہسی، علی بک کوی، طوغلہ خرمنلری و کاغذخانہ قریہسی .
- ۵ مقری کوی و بز فابریقہسی .
- ۷۲۰ ایاستفانوس
- ۱۵ کوچک چکمجہ، قالفہ کوی .
- ۲۰ قالیقطراتیہ، خلقلی مکتبی، چامورلی خان .
- ۳۰ کمر بورغازی، چیفتہ آلان
- ۲۰ کوچک کوی، سایہ اوجاغی، لیدوس، چفت بورغازی، حایا، ویران بوسنہ، ویدوس، عواص کوینہ قدر .
- ۲۵ نیفوس .
- ۳۰ جہجی قریہسی .
- ۵ چشمہ میدانی، غلطہ شیشخانہ قرہ غولی، تہہ باشی، غلطہ سرایی، یکی چارشو، طوبخانہیہ قدر .
- ۱۰ طولہ باغچہ، بشکطاش، غازخانہ، بانفالتی، شیشلی، نشان طاشی .
- ۱۰ تقسیم باغچہسی، محار، قیل برونی، یکشہر، پاپاس کوپریمی، بیوک پیالہ، اوق میدانہ قدر .
- ۱۵ سینم کوی، فری کوی، حمیدہ کوی طاش اوجاغی .
- ۱۵ زنجیرلی قیو، ماصلاغہ قدر .
- ۷۲۰ اورتہ کوی، قوری چشمہ، ارناوودکوی، بیک، روم ایلی حصاری، میرکونہ قدر .
- ۱۵ استنیہ، یکی کوی، طرابیہ، بیوکدرہ، مساربرونی، روم ایلی قواغنہ قدر .
- ۱۵ اسکدار، قوزغنجق، ایجادیہ، طاغ حامی، چینلی جامع، والدہ عتیق، قاسم آغا، نوح قیوسی، قیواغاسی، دیوتجیلر، قرہ جہ احمد سلیمیہ، قواق اسکلسنہ قدر .
- ۱۰ سلامسنز، یکی محلہ، حیدر پاشا، ابراہیم آغاچیری، آیریلق چشمہسی، یلدکرمنی، قاضی کوی، قوش دیلی، یغورتچی، مودہیہ قدر .
- ۱۰ قوربغہلی درہ، آجی بادم و جواروی .
- ۷۲۰ بکلربکی، چنشل کوی، قندیللی، اناطولی حصاری، قاکلیجہیہ قدر .
- ۱۰ چوقلی، پاشا باغچہسی، بکقوز، سودلیجہ، اناطولی قواغنہ قدر .
- ۲۵ آف بابا، درہسکی .
- ۱۰ قزل طوپراق، قلامش، فناریولی، فنارباغچہ، کوزتپہیہ قدر .

- ۲۰ ۱۲ ارن کوی، سحرای جدید، مردیون کوی، اوزون چایر، قوزیتاغنه قدر .
 ۲۰ بلغورلی، لباده، چاملیجه، قیسقلی، یالکز سروی، مهاجر کوی .
 ۱۵ بوستانچی، مالتیه، قرتال، پندکه قدر .
 ۳۰ یقه جق، بیوک، کوچک بقال کوی .
 ۶۰ دودورلی، صاری غازی، علم طاغی، عمرلی، جوارینه قدر .
 ۱۰ بالجه اطلر .

محکمہ تفسیر مقرراتی

«استینافاً ویریلان بر اعلام جزائیه استیناف استدعاسنک محتوی اولدینی اعتراضاتک ردینی استلزام ایدن اسبابک ذکر اولنماسی نقضی موجبدر»

محکمہ تمیز استدعا دائرہ سندن تنظیم اولنان ۱۶ ذی القعدہ سنہ ۳۲۷ و ۱۶ تشرین ثانی سنہ ۳۲۵ تاریخلی و ۲۰۷۴ نومرولی اعلامک صورتیدر :

خداوندکار ولایتی استیناف محکمہ سی جزا دائرہ سندن تنظیم واعطا و ۲۹ ایلول سنہ ۳۲۵ تاریخندہ امر تفہیمی اجرا قلنان ۱۷ تشرین اول سنہ ۳۲۵ تاریخ وایکوز یتیش برنومرولی اعلامک تمیزاً تدقیقی طلبنی حاوی بروسدہ روسجق محله سندن ساکن اتمکچی اصنافندن وانکل ولد دیمتری جانبندن معطی استدعانامہ واوراق متفرعہ سی باش مدعی عمومیک مأموریت ہیہ سنک ۳۱ تشرین اول سنہ ۳۲۵ تاریخلی تبلیغنامہ سی ایله محکمہ تمیز استدعا دائرہ سنہ تودیع اولنمش ولدی التددیق مذکور استدعا نامہ نک مدت معینہ قانونیہ سی طرفندہ اعطا وشرائط لازمہ سائرہ سی دخی ایفا قلندینی اکلاشلش اولغلہ بالقبول تدقیقات تمیزیه اجراسنہ ابتدار قلندی.

اعلام مذکورک خلاصہ مالی : بلدیہ چاوشلرندن رائف وشوقی افندیلری ایفای وظیفہ حالندہ ضرب ایتدیکی ادعا قلنان مستدعی وانکلک حرکت واقعہ سی اقرار مؤلی و اخبارات ایله ثابت اولدیغندن بختله قانون جزانک یوز اون دردنجی مادہ سی حکمنہ توفیقاً الی ماہ حبسنہ دائر بدایۃ صادر اولان اعلام محکوم مرقوم جانبندن استیناف ایداسی اوزرینہ اجرا قلنان محاکمہ وتدقیقات استینافیہ نتیجہ سندن حکم مذکورک اصول محاکمہ وتدقیقات قانونیہ موافق واسباب فسخیدن سالم کوزلیدیکی بیانیله تصدیقنہ قرارویرلیدیکی متضمندر

لایحہ تمیزیدہ ، اجرا قلنان محاکمہ حاضر بولنمیان مدعیلرک قرائت اولنان افادات مضبوطلرینک یکدیگریکی مکذب اولسنہ وشهود مستمعنک دخی دعوایه ویکدیگریکیه مابین ومنافض شهادتلرینہ بناء اعطا قلنان حکم ابتدائینک مغایرت قانونیہ سنہ متدائر درمیان ایلیدیکی اعتراضاتک استیناف محکمہ سنجه اسباب ردیہ سی ارانہ وتحقیقات لازمہ اجرا ایدلمکسزین تصدیق اولنمسی مغایر قانون ایدوکندن بختله اعلام استینافینک

نقضی استدعا . تبلیغنامہ دہ دخی اعتراضات مسروده نک بجا کورلمش اولدینی بیانیله ذکر اولنان اعلامک نقضی لزومی طلب وابتا قلندمشددر .

ایجابی لدی المذاکرہ : مندرجات اعلامدن مستبان اولدینی اوزرہ حکم ابتدائی علیہندہ دعوای استینافیہ قیام ایدن مظنون وانکل طرفندن درجہ اولی محکمہ سنجه مدار حکم اتخاذ اولنان اخبارات یبندہ کی مبانینک تدقیق ایدلمدیکنہ واحوال سائرہ دائر بر طاقم اعتراضات مهمہ درمیان ایدلمش ومحاکم استینافیہ مقرررات ابتدائیکہ تصدیق حالندہ اعتراضات واقعہ نک اجوبہ ردیہ سی بیان وتصریح اولنلق احکام صادرہ نک اسباب موجبہ سی استنادی لزومی مبین اولان اصول محاکمات جزائیه قانوننک یوز الی اوچنجی مادہ سی ایجابندن بولمشیکن عندالاستیناف مظنون مرقومک سرد ایلیدیکی اعتراضاتک صورمحورہ دائرہ سندن ردینی استلزام ایدن اسباب کوسترلکسزین علیہندہ لاحق اولان حکم ابتدائینک اصول وقانونہ موافقتندن بختله تصدیق ایدلمسی بولمشز ومغایر اصول وقانون اولوب لایحہ تمیزیه محتویاتی بووجهلہ وارد وبجا کورنمش ایدوکندن اصول محاکمات جزائیه قانوننک اوچوز اون دردنجی و اوچوز اون طقوزنجی مادہ لری منطوقنجه اعلام استینافینک بو سیدن طولای نقضیلہ احکام قانونیہ دائرہ سندن ایفای معاملہ اولنلق اوزرہ اوراق متعلقہ سنک محکمہ مذکورہ یہ اعادہ سنہ وایکوز غروش اعلام خرجنک تعرفہ وتعلیمات مخصوصہ سی احکامنہ توفیقاً ایلرودہ حقسنر چیقہ جق طرفندن تحصیلنہ ۷ تشرین ثانی سنہ ۳۲۵ تاریخندہ متفقاً قرار ویرلدی .

«فی ۱۰ تموز سنہ ۳۲۴ تاریخندن اول ارتکاب ایدلمش اولان جرائم عادیه حقندہ کی ۷ اغستوس سنہ ۳۲۵ تاریخلی قانونک حقوق شخصیه جهته متعلق اولان آلتنجی مادہ سنک مرجع رؤیت دعوی اعتباریلہ صورت تفسیرینی وبر اعلام استینافینک نقضی متضمن محکمہ تمیز استدعا دائرہ سندن صادر اولان ۲۵ ذی القعدہ سنہ ۳۲۷ و ۲۵ تشرین ثانی سنہ ۳۲۵ تاریخلی اعلام صورتیدر :

طرابلس غرب ولایتی استیناف محکمہ سی جزا دائرہ سندن تنظیم واعطا و ۲۸ مایس سنہ ۳۲۵ تاریخندہ امر تفہیمی اجرا قلنان ۲۲ تموز سنہ ۳۲۵ تاریخ و اون طقوز نومرولی اعلامک تمیزاً تدقیقی طلبنی حاوی اللوید سیغورطہ قومپانیہ سی وکیلی ویلیام فردریق ایله دواید الرومانی و دیموستن پتولوعیذی جانبندن مدت معینہ قانونیہ سی طرفندہ وشرائطنہ موافق صورتنده ویریلان اوچ قطعہ استدعا نامہ اوراق متفرعہ سیلہ برلکده باش مدعی عمومیک مأموریت ہیہ سنک ۲۶ اغستوس سنہ ۳۲۵ تاریخلی تبلیغنامہ سیلہ محکمہ تمیز استدعا دائرہ سنہ تودیع ایدلمش واعلام مذکورک حقوق شخصیه متدائر فقرہ حکمیہ یی دخی حاوی اولسنہ بناء جرائم عادیه محکوم ومظنونینی حقلرندہ بوکرہ نشر اولنان قانون مخصوص موجبجه فقرہ سذکورہ نک تدقیقی جائز اولوب اولامایه جفی مسئلہ سندن دائرجه تساوی آرا حاصل اولمش اولسی اوزرینہ کیفیت محکمہ تمیزک هیئت عمومیہ سنجه بالتذکر ۱۰ تموز سنہ ۳۲۴ تاریخندن اول وقوعبولمش

اولان جرم مذکورک سالف الذکر قانون حکمنجہ حقوق عمومیہ جہتی ساقط اولمش ایسہدہ حقوق عمومیہ دعواسیلہ برلکدہ اقامہ اولنان حقوق شخصیه دعواسنک محاکم جزائیہ جہ فصل ورؤیتی ایجاب ایدہ جکی اصول محاکمات جزائیہ قانونک اوچنجی مادہ سی حکمی اقتضاسندن اولوب حین رؤیت دعوادہ حقوق عمومیہ جہتک سبب مذکور دن طولای سقو طی حقوق شخصیه دعواسنک دوام رؤیتہ مانع اولہ مایہ جفی و بناءً علیہ حقوق عمومیہ دعواسیلہ برلکدہ اقامہ ایدلمش اولان حقوق شخصیه دعواسنک رؤیت و حکمی محاکم جزائیہ ک جملہ وظائفندن بولندینی جہتہ اعلام مذکورک جہات سائرہ سنک تدقیقی ضمنتہ اوراقلک دائرہ عائدہ سنہ اعادہ سی اکثریت آرا ایلہ تحت قرارہ آلمش و جرم واقمک بالادہ بیان اولندینی وجہلہ ۱۰ تموز سنہ ۳۲۴ تاریخندن مقدم ایقاع اولندینی واولابادہ کی قانون مخصوص موجنبجہ حقوق عمومیہ نامہ تعقیبات قانونیہ اجرا سنہ مساع بولمش اولدینی جہتہ یالکز حقوق شخصیه نقطہ سندن تدقیقات تمیزیہ ایقاسی لازم کلش ایدوکنندن اولوجہلہ اجرای تدقیقاتہ ابتدار قلندی .

اعلام مذکورک زبدہ مالی: «سرتفیقا» دیلان شہادتنامہ بی ساختہ اولدینی بیلہ رک استعمال ایدکلی ادعاسیلہ مظنون علیہما اولان مستدعی داوید و دیموسنک حرکت مثبتہ لرندن طولای جزا قانوننامہ ہایونک یوزاللی بشنجی مادہ سی حکمنہ توفیقاً برر سنہ حبس لرینہ و قومانیادن آلتان سکز بیک یدیوز طقسان غروشک کندولرندن تحصیلہ و مدعی شخصی قومانیہ وکیلی رایلی جانبندن طلب اولنوب تقدیری جہت جزائیہ عائد اولدینی آکلاشیلان ایکی بیک ایکوز یدی غروشک دخی مرقوماندن اخذیلہ وکیل مومی الیہ اعطاسنہ و تضمینات و سائرہ اولہ رق طلب اولنان دیگر قسم مصارف حقندہ مدعی شخصینک عائد اولدینی محکمہ یہ مراجعتہ مختار بولمنہ دائر لاحق اولان حکم ابتدائی علیہ محکوملر ایلہ مدعی شخصی قومانیہ وکیلی رایلی جانبندن معطی استیناف استدعانامہ سی اوزرینہ اسباب قانونیہ دن ناشی اعلام ابتدائینک فسخیلہ اجرا قلنان محاکمہ و تدقیقات نتیجہ سندن مظنون مرقومانک کذلک برر سنہ حبس لرینہ و قومانیہ نامہ طلب اولنان تعویضات حقندہ مدعی شخصینک محاکم عادیہ یہ مراجعتہ مختاریتہ قرار ویرلدیکی متضمندر .

مدعی شخص سیغورطہ قومانیہ سی وکیلی رایلنک لایحہ تمیزیہ سندن دلائل موجودہ و صراحت قانونیہ رغماً درجہ اولی محکمہ سی یالکز مذکور شہادتنامہ محتویاتیلہ مصارف جزائیہ نک تحصیلہ حکم ایلش و حکم واقع بوندن طولای استیناف ایدلمش ایسہدہ درجہ ثانیہ رؤیتی طاب و استدعا قلنان جہاتی محکمہ استینافیہ تدقیقی ایتدکدن ماعدادہ بدایہ تحت قرارہ آلتان حقوق شخصیه نک دخی محکمہ مذکورہ جہ ردی و حقوق عمومیہ دن تفریقیلہ محکمہ عائدہ سنہ مراجعت اولنق لزومہ قرار ویرلمی یولسز اولدینندن و محکوملر دن دیموسنک لایحہ سندن دخی رایلی یہ تعین اولنان لسان ترجمانک محاکمہ نک صوک جلسہ لرندہ بولندیرلمادینندن طرفینک ادعا و مدافعاتی لایقیلہ تفہیم اولنہ مادیی کی مذکور شہادتنامہ بی مرسل الینہ تسلیمندن بشقہ بر حرکتی غیر مشہود و محکومیتی امرندہ دلائل قانونیہ مفقود ایکن محکومیتی جہتہ کیدلمی اصول و قانونہ مغایر بولندینندن و داویدک لایحہ سندن ایسہ دعوی مبجوتہ نک رؤیتی محاکم تجاریہ عائد و رایلینک مسئلہ حاضرہ درجہ مآذونیتی اکلاشلق اوزرہ و کالتنامہ سنک محکمہ جہ قرائتی لایب اولدینی حالہ عندالاستیناف

بوراسی نظر دقتہ التفسیرین و اعتراضات مسروودہ سنک دخی اسباب موجبہ بیانیہ ردی جہتہ کیدلمکسزین اتخاذ قرار ایدلمی مخالف قانون ایدوکنندن و سائرہ دن بجملہ اعلام استینافی مذکورک نقضی استدعا اولنمش، تبلیغنامہ دخی جرائم عادیہ محکوم و مظنونینی حق لرندہ بوکرہ نشر اولنان ۸ اغستوس سنہ ۳۲۵ تاریخلی قانونک یدنجی مادہ سی موجنبجہ اشبو جنبجہ محکومیتندن طولای حکم قانونک اجرا قلنہ میہ جفی درکار ایسہدہ اعلام استینافینک حقوق شخصیه جہتندن دخی تمیزی مدت و شرائط قانونیہ سی دائرہ سندن استدعا قلنوب قانون مذبورک بومقوله دعاوی یہ متعلق اولان احکامی موادینک حقوق شخصیه بہ خلل ویرمیہ جکی قانون مذکورک التنجی مادہ سی صراحتی اقتضاسندن اولقلہ اول امردہ حقوق شخصیه دعواسنک حقوق عادیہ ویا جزائیہ محکمہ لرندن قنغیسندن رؤیت اولنہ جفی خصوصنک تعینی مقتضی و چونکہ حقوق شخصیه ادعاسی جرمندن اول وقوعہ کلش بر عقدہ مبتنی اولدینی حالہ انک اصول محاکمہ حقوقیہ توفیقاً اثباتیلہ تحت حکمہ آلمشی قابل اولہ بیلور ایسہدہ صرف حقوق عمومیہ دن منبع تضمینات دعوالرینک حکمہ ربط ایدیلہ بیللمی حقوق عمومیہ دعواسنک مبنی علیہ اولان وقعنک اصول محاکمات جزائیہ قانوننہ توفیقاً تحقیق واولابادہ درمیان اولنان دلائل و اماراتک تدقیقہ متوقف اولدینی بدیی بولمش اولقلہ اشبو صرف حقوق عمومیہ دن منبع حقوق شخصیه ادعالرینک جزا محکمہ لرنبجہ محاکمہ وثبوتی حالندہ یالکز تضمیناتہ حکم اعطاسیلہ اکثفا اولنشی جرائمندن منبع اولان سالف الذکر حقوق شخصیه نک محافظہ سنی مستلزم کورلدیکی مرقم بولنمشدر .

ایجابی لدی المذاکرہ بالادہ بیان و حکایہ قلندینی وجہلہ حقوق عمومیہ نقطہ سنہ متعلق اولق اوزرہ محکوملر جانبندن اقامہ اولنان تمیزی دعواسنک سالف الذکر قانون حکمنجہ ۱۰ تموز سنہ ۳۲۵ تاریخندن مقدم ایقاع ایدیلان جرم مدعا بہ حقندہ تعقیبات قانونیہ ایقاسنہ مساع اولہ مامسی نقطہ سندن اجرای تدقیقات تمیزیہ سنہ محل کوریلہ مامش و حقوق شخصیه حقندہ کی عدم صلاحیت قرارینہ متفرع اولان قومانیہ وکیلنک اعتراضاتہ کلنبجہ، حقوق عمومیہ دعواسیلہ برلکدہ اقامہ ایدیلان دعاوی شخصیه نک حکمہ ربطی محاکم جزائیہ نک جملہ وظائفندن بولمش ایکن محکمہ استینافیہ جہ مظنونلرک محکومیتی انتاج ایدن حرکات مثبتہ لرندن متولد تضمینات ادعاسنک قرارہ ربط ایدیلہ رک مدعی شخصینک بوبادہ مرجعہ مراجعتہ مختاریتی یولندہ اتخاذ قرار اولنشی یولسز و مغایر اصول و قانون اولوب لایحہ تمیزیہ محتویاتی شو صورتلہ وارد و بجا بولنمش ایدوکنندن اصول محاکمات جزائیہ قانوننک اوچیز اون دردنجی و اوچیز اون طقوزنجی مادہ لری منطوقجہ مذکور اعلام استینافینک یالکز عدم صلاحیتہ متدائر اولان فقرہ سنک حقوق شخصیه نقطہ سندن نقضیلہ احکام قانونیہ دائرہ سندن ایقای معاملہ اولنق اوزرہ اوراق دعوانک محکمہ محلیہ واولجہ و زنیہ تودیع ایدلمش اولان بشردن اون لیرا تمیزی جزای نقدینک اصول مذکورک اوچیز قرق اوچنجی مادہ سی منطوقجہ مستدعیلر دن رایلی ایلہ دیموسنہ اعادہ سنہ و ایکوز غروش اعلام خرجنک تعرفہ و تعلیمات مخصوصنہ توفیقاً ایلرودہ حقسز جیہ جق طرفندن استیفاسنہ ۱۶ تشرین ثانی سنہ ۳۲۵ تاریخندہ متفقاً قرار ویرلدی .

« منازع فیہ اراضینک تصرفی حقندہ قیود دفتر خاقانی بہ مراجعتہ ثبوت مدعا قابل اولہ مدینہ خالدہ طرف خارجدن ینہ طلب اولنق لازم کلور ایکن ذی الید جانبندن اقامہ اولنان شہودک شہادتہ بناء حق قرارک ثبوتہ حکم ایدیلہرک اولوجہلہ معاملہ ایفا وطلب ینہ لزوم قانونیسنہ رعایت اولنامسی مستلزم نقض اولدیغنه دائر محکمہ تمیز حقوق دائرہ سندن صادر اولان ۷ ذی القعدہ سنہ ۳۲۷ و ۷ تشرین ثانی سنہ ۳۲۵ تاریخلی و ۹۸۳ نومرولی اعلامک صورتیدر :

لاذیہ سنجاغنه تابع مرقب قضاسنک تیران قریہ سندن مقیمہ مریم بنت نخلہ سلیمان بشارہ ایلہ قریہ مذکورہ مقیمان نخلہ بن سلیمان بشارہ اولادلی نغمہ وانطانیوس ینندہ متکون دعویہ دائر مرقب بدایت محکمہ سندن ۲۲ ایلول سنہ ۳۲۳ تاریخلی ودرت عدیلہ ویریلان اعلام مزبورہ مریم طرفندن مدت قانونیسی طرفندہ تمیز اولنقلہ اعلام مذکور طرفینک اعتراض وجواب لایحلہ لیلہ بالمطالعہ تدقیقات تمیزیہ اجراسنہ ابتدار قلندی.

اعلام مذکورک خلاصہ مآلی : مرقومان نغمہ وانطانیوسک تیران قریہ سندن واقع من القدیم متصرف اولدقلى معلوم الحدود والاسامی اون طقوز قطعہ اراضیلرینہ همشیرہ لری مزبورہ مریم طرفندن وقوعبولان مداخلہنک منعی طلب ودعوی ومدعی علیہا مریم دخی منازع فیہ اراضی متوفی پدرلرندن کنديسیلہ برادرلرینہ انتقال ایدوب اولوجہلہ متصرف اولدقلى قیود خاقانی ایلہ اثباتہ حاضر ایدوکنی افادہ وانبا ایلرلی اوزرینہ اراضی مأموری حضوریلہ جریان ایدن محاکمہ وتدقیقات نتیجہ سندن مدعیلرک منازع فیہ اراضی بی اون الی سنہ دبرو بلا نزاع تصرف ایدہ کلدکلى اولبابدہ اقامہ اولنان شہودک شہادتیلہ ثابت اولمسیلہ مجلہنک بیک التیوز التمش ایکنجی و بیک سکز یوز اون سکزنجی و اراضی قانوننامہ سنک یتمش سکزنجی و اصول محاکمہ حقوقیہ قانوننک التمش سکزنجی مادہ لری موجبنجہ مدعی علیہانک اراضی مذکورہ و اتع اولان مداخلہ سنک منعه حکمدن ومستدعیہنک اشبو حکم علیہندہ لایحلہ سندن محرر باشلوجہ اعتراض منازع فیہ اراضینک پدرلرندن کندوسییلہ برادرلرینہ انتقال ایلدیکی قیود خاقانی ایلہ مثبت ایکن محکمہ جہ بوطریق قانونی بہ مراجعتہ حل مسئلہ ایدلامسی مغایر قانون اولدیغندن بخلہ اعلامک نقضی استدعاسندن ولایحہ جوابیہ مؤداسی دہ اعتراض مذکورک واهی اولدیغنی بیانیلہ ردی و موافق قانون اولان اعلامک تصدیقی طلبندن عبارت بولنمشدر .

ایجابی مذاکرہ اولندقدہ ؛ اعلام مذکور مآلندن منفہم اولدیغنی اوزرہ ہرنہ قدر مذکور اراضی بہ مدعیلرک اون الی سنہ دبرو بلا نزاع تصرف ایتکدہ اولدقلى استماع اولنان شہودک شہادتیلہ ثابت اولدیغندن طولانی مدعی علیہانک منع مداخلہ سنہ حکم اولنمش ایسہ مدعی علیہا اراضی منازع فیہ پایہ پدرلرندن انتقالاً برادرلرینہ متصرف اولدیغنی بیان ایلدیکی ومدعیلر ایسہ تصرفلرینی اسباب تصرفدن بر جہتہ استناد ایتیموب اسباب تصرفدن برینہ مستند اولمان مرور زمانلہ حق قرار ثابت اولمہ جغنی طابو تعلیماتنک سکزنجی مادہ سی ایجابندن بولدیغنی خالدہ مدعی علیہانک تصرفی حقندہ قیود دفتر خاقانی بہ مراجعت ایدلمک و قیود دفتر خاقانی ایلہ ثبوت مدعا قابل اولہ مدینہ صورتدہ مدعی علیہا خارج ومدعیلر ذی الید بولنق جہتیلہ مجلہنک

(۱۷۵۷) نجی مادہ سی موجبنجہ ترجیحاً مدعی علیہا طرفندن ینہ طلب اولنق لازم کلور ایکن شو لزوم قانونی بہ عدم رعایتلہ مدعیلر طرفندن اقامہ اولنان شہادتلرک شہادتہ بناء حق قرارک ثبوتہ حکم ایدلمسی یولسز و اصول و قانونہ مخالف کورلش اولمسنہ مبنی اصول محاکمہ حقوقیہ قانوننک ایکوز اوتوز ایکنجی و ایکوز قرق برنجی مادہ لری موجبنجہ اعلام مذکورک نقضیلہ قانون مذبورک ایکوز قرق دردنجی مادہ سی حکمنہ توفیقاً کیفیتک تکرار بالرؤیہ اعلامہ ربطی ضمنندہ محکمہ مذکورہ اعادہ سنہ وزیردہ مفرداتی مرقم اولوب اول و آخر مستدعیہ تمیز مریم طرفندن ویریلان بشیوز اون ایکی غروش مصارف تمیزیہنک ایلرودہ حقسنز چیقہ جق طرفہ عائد اولمسنہ ۳ نیسان سنہ ۳۲۴ تاریخندہ متفقاً قرار ویرلدی .

« تحلیف شہودک صراحت قانونیہ توفیق و شرائط تکرارک تدقیق و مدافعہنک اسباب موجبہ درمیانیلہ رد اولنامسی مستلزم نقضدر . »

بو بابدہ محکمہ تمیز جزا دائرہ سندن صادر اولان ۱۷ ذی القعدہ سنہ ۳۲۷ و ۱۷ تشرین ثانی سنہ ۳۲۵ تاریخلی و ۴۹۰۷ نومرولی اعلامک صورتیدر :

بوللی کورت مانوق اوغلی مانوق ورفقاسنک اثنای راہدہ اوکلرینہ کچہرک تقود موجودہ لری غصب ایتدیکی ادعا قلنمسنندن طولانی جنایتلہ اتہام اولنان عرب اوغلی دیمستوقلینک بالحاکمہ مکرر ایکی حسیلہ قانون جزانک سکزنجی و ایکوز یکرمی برنجی مادہ لری توفیقاً الی سنہ مدتلہ کورکہ قولنسنہ دائر اطرغل سنجاغنی بدایت محکمہ سی جزا دائرہ سندن ویریلان ۳۱ مارت سنہ ۳۲۵ تاریخلی و یوز اوتوز طقوز نومرولی اعلام ایلہ متفرعاتی باش مدعی عمومیلک مأموریت علیہ سندن ۱۴ تشرین اول سنہ ۳۲۵ تاریخلی و ۳۸۳۶ نومرولی تبلیغنامہ ایلہ محکمہ تمیز جزا دائرہ سنہ ارسال اولنقلہ مطالعہ قلندی . تبلیغنامہ شہودک امر تحلیفلرینک احکام قانونیہ دائرہ سندن اجرا ایدلنک اعلامدہ کوسترلامسی و تکرر جرم ایچون وجودی قانوناً مشروط اولان محکومیت سابقہنک کسب قطعیت ایدوب ایتدیکی ونوعیلہ صورت وقوعی و اعلام تاریخ ونومروسی تحقیق ایدلمکسزین مکرر لکدن طولانی جزاسنک ایکی قات اولہرق تعین اولنمش و اقرارک جبر واکراہہ مستند اولدیغنه دائر متہم ایلہ وکیلک مدافعات واقعہ لرینک اسباب موجبہ درمیانیلہ رد ایدلامسی مخالف قانون اولدیغندن بخلہ اعلامک نقضی طلب ایدلمشدر .

تدقیقات تمیزیہ اجرا اولندقدہ تبلیغنامہ دہ محرر اعتراضات مندرجات اعلامہ نظراً وارد و مستلزم نقض اسباب قانونیہ مستند بولندیغندن اصول محاکمات جزائیہ قانوننک اوچیوز اون دردنجی مادہ سنہ توفیقاً اعلام مذکورک نقضیلہ اوراقک محلہ اعادہ سنہ و ایکوز غروش اعلام خرجنک تحصیلہ ۲۲ تشرین اول سنہ ۳۲۵ تاریخندہ قرار ویرلدی .

« اتهام مضبوطه سی خارجنده اوله رق اقامه دعوی و حکم اعطا اولمسی و شهودك تعریف قانونی دائره سنده تحلیف ایدلامسی ، متهمك برادر زاده سنك بلا تحلیف اجتماع و شاهدك سبب قانونی اولدینی حالده افاده مضبوطه سنك قرائتیه اکتفا قلمسی و اجتماع جرائم حقنده کی قاعده قانونیه نك بعدالحکم ده تطبیق واعلامده چیزیلان کله لرك تصدیق اولنامسی نقضی مستلزمدر . »

محکمه تمیز جزا دائره سندن صادر اولان ۲۴ ذی القعدة سنه ۳۲۷ و ۲۱ تشرین ثانی ۳۲۵ تاریخلی و ۵۱۹۳۰ نومرولی اعلامك صورتیدر :

چولاق علی و رفقاسنك قینارجه قریه سی جوارنده متصرف اولدقلری دکرمنی لیل و مسلحاً باصهرق حیوانلرینی اخذ و نهب ایتدکلری ادعاسیله جنایتله اتهام اولنان عبدالله اوغلی یوان علی ودیگر بر ماده دن ناشی محکوماً مجبوس بولنان مصطفی اوغلی خورشید ایله عثمان پهلوان اوغلی اسعدك اجرا قلنان محاکمه لری نتیجه سنده بولردن یوان علی و خورشیدك قانون جزانك ایکوز یکرمی برنجی ماده سنه تطبیقاً اوچر سنه مدته کورکه قوللرینه و اسعدك دخی دیگر بعض مواد جنایتدن ناشی محاکمه سنك دردست رؤیت بولمسی حسبیه تحدید جزانك مذکور محاکمه نك نتیجه سنه تعلیقته قرار ویرلدیکنی متضمن ارطغرل سنجانك بدایت محکمه سی جزا دائره سندن صادر اولان ۳۱ مارت سنه ۳۲۵ تاریخلی و یوز یتش بر نومرولی اعلام ایله متفرعاتی باش مدعی عمومیلک مأموریت علیه سندن ۱۷ تشرین اول سنه ۳۲۵ تاریخلی و ۳۸۴۴ نومرولی تبلیغنامه ایله محکمه تمیز جزا دائره سنه کوندرلکله کافه اوراق دعوی مطالعه قلندی .

ذکر اولنان تبلیغنامه ده مرقومون علی و خورشید و اسعد ، یالکنز سالف الذکر چولاق علی و رفقاسنك حیواناتی اخذ و غصب ایتلرندن طولانی مهتم اولوب طویجی دره سی موقعنده سلیمان بکک دکرمنی باصهرق ابراهیم اوغلی عثمان و چرکس اوغلی حسن و چاوش اوغلی عثمانك دخی برر رأس حیوانلرینی سرقته جراتلری حقنده نه مضبوطه اتهامیه ده ونده بدایت مستنطق قرارنامه سنده اصلاً بحث ایدلامشیکن مستنطق شو سهوی انشای محاکمه ده اکلاشیله رق باقرار محکمه اوراق دعوی اعاده ایدلمسیله تصحیح قلندقدن صکره اشبو ایکنجی سرقتدن ناشی ده محاکمه لری اجرا و حکمه ربط ایدلمش و بناء علیه اصول محاکمات جزائییه قانوننك ایکوز اوتوز بشنجی ماده سنه مغایر اوله رق اتهام مضبوطه سی خارجنده قالان ایکنجی سرقتدن طولانی ده اقامه دعوی ایله بو جرمدن دخی محکومیتلری جهته کیدلمش اولمسی و بالعموم شهودك اصول مذکورك ایکوز ایتش سیکزنجی ماده سنك تعریفاتی دائره سنده تحلیفلرینك اجرا ایدلامسی و ادعا شهودندن محمد بکک متهملردن اسعدك برادر زاده سی بولدینی بیانیله اصولك ایکوز یتش اوچنجی ماده سنه یا کاش معنا ویریله رک بلا تحلیف معلوماتنه مراجعت اولمسی وینه ادعا شاهدلرینن حقی بکک قراده بولمسی حسبیه افاده مضبوطه سنك قرائتیه اکتفا قلمسی متهمون مرقوموندن خورشیدك دیگر بر غصب ماده سندن اون سنه کورکه محکوم اولدینی بحث ایدلمسه کوره هانکی تاریخده ونه کی اشیا ویا حیواناتک نه صورتله غصبندن محکوم وهانکی تاریخلی اعلام تمیزی ایله حکمی مصدق بولندیغنك لایقیله تدقیق و تعمیق ایدیلهرک

نتیجه حاصلیه کوره معامله قانونیه ایفاسی مقتضی و ایکنجی جرم اون سنه یه محکومیتی استلزام ایدن اولکی جرمك هنوز قطعیت کسب ایتلمش اولدینی برزمانده ایقاع ایدلمش بولدینی صورتده قبل الحکم اجتماع جرائم حقنده کی قاعده قانونیه نك بعدالحکم ده تمامی محفوظیتی و تعدد جرائم طولانی تعدد محکومیه امکان بر اقلمامسی تأمیناً حکم اخفك جزای اشد قلی صورتیه اصول مذکورك ایکوز طقسان طقوزنجی ماده سنك محافظه احکامی و شرکی اسعد حقنده تطبیق ایدیلان بو معامله قانونیه نك مرقوم خورشیده دخی بر منوال محرر تشمیلی لازمه دن ایکن بوندن ده ذهول ایدلمسی و ثبوت جرمه دائر قرار اتخاذه دن صکره وکیل مدافعك مدافعات واقعه سنك ردینه قرار ویرلمسی و اعلامك یکرمی بشنجی صحیفه سنده چیزیلان درت سطرک تصدیقسر بر اقلمسی و بعض اقسامی ضبطنامه شکلنده تحریر اولمسی مغایر قانون بولدیغندن بحثله اعلامك نقضی طلب ایدلمشدر . تدقیقات تمیزییه لدی الاجرا تبلیغنامه محتویاتی اعلام مندرجانه نظرآ وارد و بجا بولدیغندن اصول محاکمات جزائییه قانوننك اوچوز اون دردنجی ماده سنه توفیقاً اعلام مذکورك نقضیه اوراقك محله اعاده سنه وایکوز غروش خرج اعلامك تحصیلنه ۲۰ تشرین اول سنه ۳۲۵ تاریخده قرار ویرلدی .

« بر حکم جنایتك نقضی اوزرینه اعلام سابقك قرائت و نقطه منقوضیه قدر اولان قسمك اعلام اخیره درج اولنامسی ووصف جرم حقنده کی مجرمیت قراری ایجابنه مخالف اوله رق تعیین مجازات ایدلمسی مستلزم نقضدر . »

محکمه تمیز جزا دائره سندن صادر اولان ۲۵ ذی القعدة سنه ۳۲۷ و ۲۵ تشرین ثانی سنه ۳۲۵ تاریخلی و ۵۲۷۸ نومرولی اعلامك صورتیدر :

مدرنسك اورلیرلر قریه سندن فیریش اوغلی اسماعیل ایله اوغلی اشرفی تعمداً جرح و قتل ایلدیکی ادعاسیله جنایتله متهم فنارجی اوغلی علی حقنده مقدما ویریلان حکم عند التیمیز نقض ایله اوراقی اعاده قلمسی اوزرینه اخیراً جریان ایدن محاکمه سی نتیجه سنده قانون جزانك یوز یتش دردنجی ماده سنك فقره اخیره سنه تطبیقاً اعدامنه دائر بولی سنجانجی بدایت محکمه سی جزا دائره سندن صادر اولان ۸ تموز سنه ۳۲۴ تاریخلی و اوچوز بر نومرولی اعلام ایله اوراق متفرعه سی باش مدعی عمومیلک مأموریت علیه سندن ۱۸ تشرین اول سنه ۳۲۵ تاریخلی و اوچیک طقوز یوز اون طقوز نومرولی تبلیغنامه ایله محکمه تمیز جزا دائره سنه ارسال ایدلکیندن مطالعه قلندی .

تبلیغنامه ده نقض اخیر اوزرینه علی الاصول تشکیل طرفین اولندقدن صکره تمیز اعلامیه برلکده اعلام منقوضك ده قرائتیه مندرجانه هیئت جدیده جه اطلاع حصولی و نقطه منقوضیه قدر اولان اعلام سابقك اعلام اخیره درجی لوازم قانونیه دن ایکن بودا رده ایفای معامله اولونامسی ومدعی عمومی معاونی ، متهم بر جرمی برای اجرا دیگر جرمك مرتکبی اولمسنندن بحثله مجرمیتی طلب ایتش و مجرمیت قرارینك مقدمه سنده جرم اولوجهله توصیف ایدلمشیکن طلب واقع رد ایدلمکسزین نهایترنده قاتل متهور اولق

اوزرہ تجربہ قرار ویرمکله برابر توصیف جرمہ کورہ تحدید مجازات قسمندہ بو نقطه حقندہ مخالفت قطعاً غیر جائز ایکن مجرمیت قرارینہ مخالف اوله رق قانون جزانک یوز یتیش دردنجی ماده سنک ایکنجی فقره سنہ توفیقاً اوچ رای ابله اعدامه قرار ویرلسی و ثبوت جرمی موقع بحث و مذاکره وضعله قرار گیر اولدقن صکره وکیلک مدافعتنک رد ایدلش اولسی نقضی موجب اسباب قانونیه دن بولندینی بیانیله اعلام اخیر مذکورک نقضی طلب ایدلشد.

تدقیقات تمیزیه لدی الاجرا تبلیغنامه مندرج اعتراضات وارد و مستلزم نقض اسبابدن بولنقله اصول محاکمات جزائی قانوننک اوچ یوز اون دردنجی ماده سنہ توفیقاً اعلام اخیر مذکورک دخی نقضیه اورا قنک محله اعاده سنه و ایکیوز غروش اعلام خرجنک تحصیلنه ۲۴ تشرین اول سنه ۳۲۵ تاریخندہ قرار ویرلدی.

انجمن عدلیہ مقرانی

امور حقوقیه مدیریت بهیسه سندن ۵ تشرین ثانی سنه ۳۲۵ تاریخله بالتقدیم انجمن عدلیه حواله بیوریلان و خلاصه مالی بلا امتحان دعوی و کلتی ایچون رخصتنامه اعطاسی دعوی وکیللری نظامنامه سی مقتضاسنجه برسنه مدتله بدایت محکمه سی ریاستی ویا استیناف محکمه سی اعضالغندہ بولنش اولانلره حصر ایدلش و ولایت ولوا مدعی عمومیلکلرنده بولنش بعض ذواته قیاساً رخصتنامه اعطا ایدلیکی حقندہ امثال موجود ايسده اوصاف حاکمیتی حائز اولملری ایجاب ایدن مدعی عمومیلرله لوا وقضا مدعی عمومی معاونلکلرنده استخدام ایدلش بولنانلر حقندہ دخی رخصتنامه اعطاسی جائز اولوب اولمادیقنک استیداننه دائر اولان مذکره مطالعه و تدقیق اولندقن صکره لدی المذاکره لوا و ولایت مدعی عمومیلکلرینه اصول جاریه ایجابجه قضا بدایت محکمه سی ریاستلرنده ایفای وظیفه ایدنلر تعیین اولنقلده اولسنه نظراً مأمورین موسی الیم حقندہ دعوی وکیللری نظامنامه سنک تشمیلی جائز اوله بیلور ايسده معامله واقعه قضا بدایت محکمه سی مدعی عمومی معاونلکلرنده بولنان ذوات حقندہ جائز اوله میه جفته قرار ویرلدی. ۱۶ تشرین ثانی ۳۲۵

نقغه دن طولای مقدمه حبس ایدلش اولان بر مدیونک اکل مدتله تخلیه سندن صکره ایشلمش اولان نقغه نک یکی بر دین عدلیه تکرار حبسی جائز اولوب اولمادیقنک استیداننه دائر اعلامات شرعیه اجرا مأمورلری طرفدن بالتنظیم انجمن عدلیه حواله بیوریلان ۲۷ تشرین اول ۳۲۵ تاریخلی مذکره مطالعه اولندی. نقغه حقندہ کی حکمراً نا فائاً تحقیق ایدمکجه بناء اولجه تحقیق ایدن دیون ایچون اجرا اولنان حبسک یالکزر حبس تاریخنه قدر اولان نقغه لره عائد طوتیلوب بعدالجبس ایشلیه جک اقسام نقغه به شامل طوتیلما سی و بناء علیه مؤخر آیشلیان نقغه ایچون تکرار حبسک اجراسی لازم کله جکجه متفقاً قرار ویرلدی. ۱۶ تشرین ثانی ۳۲۵

توصیهات عدلیه

محکمه تمیز باش مدعی عمومی معاونلکی در سعادت استیناف محکمه سی مدعی عمومی معاونلرندن وهی بکه در سعادت استیناف محکمه سی مدعی عمومی معاونلکی بک اوغلی بدایت محکمه سی مدعی عمومی میلکی باش معاونی حامد بکه. بک اوغلی بدایت محکمه سی مدعی عمومی میلکی باش معاونلکی در سعادت بدایت محکمه سی مدعی عمومی معاونلرندن عبدالصمد افندی به در سعادت بدایت محکمه سی مدعی عمومی معاونلکی بک اوغلی بدایت محکمه سی مدعی عمومی معاونلرندن نظیف بکه بک اوغلی بدایت محکمه سی مدعی عمومی معاونلکی قسطنونی ولایتی مرکز بدایت محکمه سی جزا دائره سی رئیس کال بکه بک اوغلی بدایت محکمه سی مدعی عمومی معاونلکی محکمه تمیز جزا دائره سی ضبط کتبه سندن و مکتب حقوق مأذونلرندن نصرت بکه تفویض بیورلش و عمومی الیمدن محاف اولیان نصرت بکک اصول مقررہ وجهله امر تحلیفی اجرا ایدلشد.

سیروز سنجانی بدایت محکمه سی مدعی عمومی معاونلکی مار دین سنجانی بدایت محکمه سی مدعی عمومی معاونی ضیاء الدین افندی به تفویض بیورلش و موسی الیه ذاتاً محلف بولنشد.

سلانیک بدایت محکمه سی اعضالغه سلانیک استیناف محکمه سی اعضا ملازمی عبدالرحیم افندی. سلانیک اعضا ملازمکنه سلانیک اجرا مأموری محمد افندی، کوکیلی قضاسی مدعی عمومی معاونلکنه سلانیک ایکنجی مستطقی امین افندی، فترین قضاسی بدایت محکمه سی مدعی عمومی معاونلکنه قضای مذکور بدایت محکمه سی اعضا سندن و مکتب حقوق مأذونلرندن ضیا افندی، درامه سنجانی بدایت محکمه سی اعضالغه بکرش حقوق دارالفنونندن مأذون طودورا کی پاپانیا کی افندی، درامه سنجانی بدایت محکمه سی اعضالغه نوردقوب قضاسی بدایت محکمه سی اعضا سندن آریستیدی افندی، سیروز سنجانی بدایت محکمه سی اعضالغه قواله قضاسی بدایت محکمه سی اعضا سندن اوستاش افندی، بتلیس ولایتی بدایت محکمه سی اعضالغه بتلیس ولایتی بدایت محکمه سی باش کاتبی عبدالحمید افندی، از میر ولایتی تجارت محکمه سی اعضالغه از میرده دعوی وکیلی مکتب حقوق مأذونلرندن استاوری قاپسالی افندی، دبره سنجانی بدایت محکمه سی اعضالغه قیرچوه قضاسی بدایت محکمه سی اعضا سندن صادق افندی، جبل برکت سنجانی بدایت محکمه سی اعضالغه انقره بدایت محکمه سی اعضا سابقه سندن قصباریان کیرقور افندی، سیوه رک بدایت محکمه سی جزا ریاسته ارضروم ولایتی استیناف محکمه سی اعضا سندن حسین فکری افندی، ارضروم استیناف محکمه سی اعضالغه کره بنه قضاسی بدایت محکمه سی جزا رئیس راشد افندی، اخلاط قضاسی بدایت محکمه سی جزا ریاسته دیار بکر ولایتی استیناف محکمه سی باش کاتبی احمد جودت افندی، غزه قضاسی بدایت محکمه سی جزا ریاسته محکمه

تمیز حقوق دائره سی کتبه سندن ومکتب حقوق اعلی مأذونلرندن طاهر بک ، سوکه قضاسی بدایت محکمه ی مدعی عمومی معاو لنکته مکتب حقوق اعلی درجه ده مأذونی بولنان احمد جلال الدین افندی ، قوصوه ولایتی مرکز بدایت محکمه سی مدعی عمومی معاو لنکته مکتب حقوق اعلی درجه ده مأذون عبداللطیف لطفی افندی ، چینه قضاسی بدایت محکمه سی مدعی عمومی معاو لنکته مکتب حقوق اعلی درجه ده مأذون اسماعیل مظهر افندی ، کوپرلی قضاسی بدایت محکمه سی مدعی عمومی معاو لنکته وان ولایتی بدایت محکمه سی اعضا سندن ابراهیم ادهم افندی ، فیلات قضاسی بدایت محکمه سی مدعی عمومی معاو لنکته یانیه ولایتی استیناف محکمه سی جزا دائره سی باشکاتی رفعت افندی ، کیلان قضاسی بدایت محکمه سی مدعی عمومی معاو لنکته لسقویک قضاسی بدایت محکمه سی اعضا سندن ادریس افندی ، اشقودره ولایتی مرکز بدایت محکمه سی حقوق دائره سی ریاسته یانیه ولایتی بدایت محکمه سی جزا دائره سی رئیس شوقی افندی ، یانیه ولایتی مرکز بدایت محکمه سی جزا دائره سی ریاسته درامه سناغی بدایت محکمه سی جزا دائره سی رئیس اسماعیل حق افندی ، درامه سنجاغی بدایت محکمه سی جزا دائره سی ریاسته مناستر ولایتی استیناف محکمه سی اعضا سندن حسین حسنی افندی ، مناستر ولایتی استیناف محکمه سی اعضا لفته جسر مصطفی پاشا قضاسی بدایت محکمه سی جزا دائره سی رئیس مصطفی صبری افندی ، جسر مصطفی پاشا قضاسی بدایت محکمه سی جزا دائره سی ریاسته ادرنه ولایتی استیناف محکمه سی جزا دائره سی باش کاتبی علی رضا افندی ، قسطنطونی مرکز بدایت محکمه سی جزا دائره سی ریاسته جزائر بحرسفید ولایتی بدایت مدعی عمومی معاونی خاکی افندی ، جزائر بحرسفید ولایتی بدایت محکمه سی مدعی عمومی معاو لنکته دراج سنجاغی بدایت محکمه سی جزا دائره سی رئیس مصطفی نوری افندی تعیین بیورلش ومخلف اولیانلر در دست تحلیف بولنشدلر .

سامرلر انتباه

توقاد سنجاغی مدعی عمومی معاونی حسن فهمی افندینک لواء مزبور بلدییه طبیبی انسپاش افندی ایله برابر محکمه دن قرار استحصال ایتکسزین فضلہ خرج راه الدینی وکندوسنه اخبار اولنان جرائم مشهودیه طلب ایتدیکی خرج راهک ویرلما سندن ناشی کتمیه رک حقوق عمومیه نک ضیاعنه سببیت ویردیکی اجرا قلنان تحقیقات نتیجه سنده تظاهر ایتش اولمسیله بوندن طولای طبیب مومی الیه ایله توحیداً محاکمه لری ایفا اولنق اوزره معاون مومی الیهک محاکمه الته الته الته عدلیه نظارت جلیله سنجه امر ومأذونیت ویرلشدلر .

شئون عدلیه :

مرکز وولایات محاکمه قوللانقده اولان دفاتر ایله اوراق مطبوعه نک شکل ومندرجاتی اعتباریه یکنسق اولمسنده کی محسنات، عدلیه نظارتجه نظر دفته انهرق بالاخره بالجله محاکمک احتیاجاته کفایت ایده جک مقداره انجمن اداره عدلیه جه طبع واحضاره عائد معاملات باشلامق اوزره دفاتر واوراق عدلیه نمونه لرینک مسارعة ترتیبی ضمننده محکمه تمیز اعضا سندن عبداللطیف وباش مدعی عمومی ملک باش معاونی مظهر بکر ایله محکمه جنایت اعضا سندن ارتین موسدیجیان افندیلرندن مرکب بر قومیسون تشکیل ایدیلرک ایفا وظیفه یه ابتدار ایدلشدلر .

اعلانات

اوپوز یکریمی درت سنه سی کانون ثانیسنک یکریمی یدنجی کیجه سی یکدیگری قتل قصدیه جرح ایلدکاری ادعاسیله مظنون علیهما اولوب غیرموقوف بولنان اقسرای جوارنده حویبار محله سنده جامع شریف زقاغنده مستأجراً ساکن صحنه عالم تیاتروسی اعلانیجیسی اوزونجه بویلی اسمر بکزی سیاه قاش صاچ وبقی مطروش چهره لی چامور نورینک اصول محاکمات جزائییه قانوننک مواد مخصوصه سی احکامنه توفیقاً رفیق موقوف صائم ایله برلکده جنایت محکمه سنده محاکمه سی اجرا قلنق اوزره قانون جزانک یوز سکسانجی ماده سنه توفیقاً جنایتله اتمانیه قرار ویرلدیکندن متهم مرقومک هرزده کوریلور ایسه طوتیلوب محکمه مذکورہ توقیفخانه سنه تسلیمی لازم کله جکی بالجله ضابطه عدلیه مأمورلرینک معلومی اولق اوزره اشبو اخذ وکرفت مذکره سی در سعادت هیئت اتمانیه سندن بالتظیم اعطا قلندی . ۲۳ تشرین ثانی ۳۲۵ سنه

ازمراغده وکیلی قسطنطینوس اپوستولیدیس افندی طرفندن محکمه یه ویریلان ۲۸ تشرین اول سنه ۳۲۵ تاریخی استدعاده بک اوغلنده قیل بروننده ساکن روم ملتندن طناس ولد یانی ذمتنده الهجنی اولان یوز یکریمی عدد لیرای عثمانینک مع فائض ومصارف محاکمه تحصیل طلب اولنقله تنظیم وخدمه سی محمود افندی واسطه سیله ارسال اولنان دعوتیه ظهرینه تسطیر اولنان شرحدن مرقومک محل مذکوردن چیقارق نه طرفه کتدیکی مجهول بولندیکی اکلاشلمش اولدیغندن معامله مقتضیه تبلیغیه سنک اصول محاکمه حقوقیه قانوننک یکریمی نتیجی ماده سنک فقره اخیره سی حکمنه توفیقاً اعلاناً اجرایی وکیل مومی الیهک طلب واقعی اوزرینه اجرای محاکمه کله جک کانون اولک یکریمی برنجی بازار ایرتسی کونی ساعت بشه قرارلشدیریلوب اولبایده تسطیر وامللا قلنان دعوتنامه محکمه دیوانخانه سنه تعلیق ایدلش اولدیغندن مدعی علیه مرقوم طناسک

یوم و وقت مزبورہ بک اوغلی بدایت محکمہ سی برنجی حقوق دائرہ سندنہ حاضر بولمسی لازم کله جکی و بولمندی و یاخود مصدق سندنہ بروکیل کوندرمدیکی صورتہ مدعینک طلبیلہ دعوی مذکورہ نک غیاباً رؤیت و فصل اولنہ جنی بیانیه اعلان کیفیتہ ابتدار قلندی . ۲۶ تشرین ثانی سنہ ۳۲۵

محمد ولی الدین افندیخ خلیل افندی ذمتندہ بااعلام محکومہ الہ جنی اولان مبالغ معلومہ نک تأمین استیفاسی ضمنندہ مدیون مومی الیہک پدری مصطفی اغا بن خلیل عہدہ سنہ مقید بولنان برنجی دائرہ داخلندہ صہان ویران ثانی محلہ سندنہ اوزون چارشو جادہ سندنہ درتیوز اوتوز نومرولی دکان درونندہ مستقر عبدالمجید خان اول و قفندن کدکی کوسم سنان و قفندن ملکی و مرجان اغا محلہ سندنہ باب سرعسکری جادہ سندنہ وقف مشارالیهما دن درت نومرولی مع اوطہ و دکان و الیوم دکان یکدیگریہ مقلوب تخمیناً یکرمی ایکی ارشون اوچ پرمق اوزرینہ مینی فوقندہ بر اوطہ بی مشتمل بر باب دکاندہ مدیون مومی الیہ ارثاً انتقال ایدن نصفندن ثلث حصہ سنک تاریخ اعلاندن اعتباراً اون بش کون صکرہ بلمزاید فروختہ تشبث اولنہ جنندن طالب اولوب دہا زیادہ معلومات المقی استیانلرک بک اوغلی اجرا دائرہ سنہ مراجعت ایللری اعلان اولنور . ۲۸ تشرین ثانی سنہ ۳۲۵

جیلہ خانمک خزینہ خاصہ شاہانہ متعہد لرندن حسین بک ذمتندہ بک اوغلی ایکنجی حقوق دائرہ سی اعلامیلہ محکوم بہ الاجنی اولان مبالغ معلومہ نک تأمین استیفاسی ضمنندہ مدیون مومی الیہک پدری محمد رائف اغادن انتقالاً متصرف اولدینی در سعادندہ الاجہ حمام قربندہ چلی علاالدین محلہ سندنہ مصر چارشو سندنہ ارزاق انباری درونندہ کائن یدی و یکرمی یدی نومرولرہ مرقم ایکی باب مغازدہ نظاملو کدکنک یوز یکرمی سہم اعتباریلہ قرق سہمی لدی المزایدہ التي بیک غروش التون اچہ بدل ایلہ طالبی عہدہ سندنہ تقرر ایدرک موقت قرار دادہ سی کشیدہ قلندیغندن تاریخ اعلاندن اعتباراً اوتوز برکون ظرفندہ لاقول یوزدہ بش ضمیله طالب اولانلرک یوزدہ اون نسبتندہ کی دیپوزیتو اچہ لرینی مستصحباً بک اوغلی اجرا دائرہ سنہ مراجعت ایتلری ومدت مذکورہ ختامندہ یعنی شہر کانون اولک اوتوز برنجی چہار شنبہ کونی ساعت اون رادہ لرنندہ صوک مزایدہ علنہ ی اجرا و قراردادہ قطعیتی کشیدہ قلنمق اوزرہ مارالذکر املاک مذکورہ پیشکاهندہ مأموری مواجہہ سندنہ حاضر بولمیری بک اوغلی اجرا دائرہ سندنہ اعلان اولنور .

فی ۲۸ تشرین ثانی سنہ ۳۲۵



قانونیہ

محاکم نظامیہ وظائفنک تقییدی

محاکم نظامیہ نک وظائفی اوچ صورتہ تقید و تخصیص اولنمشدر .

۱ مسائل خلاقیہدہ بر مجتہدک قولیلہ عمل اولنمسی صورتیلہ واقع اولان تقییددر . بوکا دائر مجلہدہ پک چوق مسائل موجود بولنمشدر . مثال اولمق اوزرہ بر مسئلہ نک ذکر مناسبد .
مجلہ نک ۱۷۹ نجی مادہ سندنہ بیان اولدینی اوزرہ متبایعاندن بری متعدد شیلرک بہالری تفصیل ایتسہ دخی بیعی طوبدن وصفقہ واحدہ ایلہ اولہرق ایجاب ایتدکدہ عند الامام صفقہ بیع تکرر ایتمز . بناءً علیہ دیگرکی مذکور ایجابی قبول ایدہ جک اولدقدہ طوبدن قبول ایتسی لازم کلور . صفقہ بیعی تقریق ایدہ رک میعلرک برینی ، ذکر ایدیلان بہا ایلہ قبول ایتسہ بیع منعقد اولماز . عند الامامین مجرد تفصیل ثمن ایلہ بیع تعدد ایدر . بناءً علیہ قابل ، میعلرک برینی بیان اولنان بہا ایلہ قبول ایتدکدہ بیع منعقد اولور . ایددی بومسلئدہ حاکم ، امامین مذہبی اوزرہ حکم ایتسہ حکمی صحیح اولماز .

۲ وظیفہ ایلہ اولان تقییددر .

بوجہلہ تقییدہ بعض مسائلک استثناسیلہ واقع اولان تقیید اطلاق اولنور . بوکا پک چوق مسائل تفرع ایدر .
اولاً — محاکم شرعیہ عائد دعاوی محاکم نظامیہدہ رؤیت ایدیلہ من .
ثانیاً — دعاوی حقوقیہ محاکم حقوقیہدہ فصل ایدلک لازم کلور . بونلر محاکم تجاریہدہ رؤیت اولنہ ماز
ثالثاً — دعاوی تجاریہ محاکم حقوقیہدہ کوریلہ من .
رابعاً — محاکم ابتدائیہ عائد دعاوی محاکم استثنائیہ و محاکم استثنائیہ راجع دعاوی محاکم ابتدائیہدہ فصل اولنہ ماز .

خامساً — محاکم ادارہ عائد دعاوی محاکم نظامیہدہ رؤیت اولنہ ماز .

۳ مکان ، تعبیر دیگرلہ صلاحیت ایلہ تقییددر . یعنی ہر محکمہ نک حق قضاسی بر ادارہ حصر و تخصیص ایدلسیلہ واقع اولان تقییددر . علی العموم محاکم نظامیہ نک حق قضاسی بروجہ مقرر مقید بولنمشدر .
دولتک ادارہ ملکیتی ولایاتہ ، ولایات الویہ و الویہ قضالہ منقسم اولدینی کی محاکم دخی بروجہ مشروح منقسم بولنمشدر .

مثلاً بروسہ محکمہ سنک حق قضاسی بروسہ قضاسنہ منحصردر . بروسہ ملحق کرماستی قضاسندہ حق حاکمیتی یوقدر . نتہ کم بروسہ حاکم الشرعک حق قضاسی دخی بروسہ انحصار ایدر .
فقط محکمہ شرعیہ ایلہ محکمہ نظامیہ آرہ سندنہ بو مسئلہدہ بر فرق وارددر .
بر قضانک حاکم الشرعی دیگر قضادہ اقامت ایدن مدعی علیہ محکمہ سنہ دعوت ایدوبدہ اودہ بالاجاہ

دیگر قضاہ مقرر بولندینی و بناءً علیہ دعوی واقعہ نیک اقامتکاهی محکمہ سنہ حوالہ سی لازم کله جکی ادعا ایتسه نظر التفاته آلتاز و حاکم الشرع دعوی فصل ایدہ بیلور . مدعی علیہ مسافرت طریقہ دائرہ قضاسنه کیرمش اولغله حق قضاسی حاصل اولدی . معلومدرکه بر قضا حاکمی او قضانک بالخاصه اهالی اصلیه سی حقنه حکمه مأمور دکلدر . کرک اهالی اصلیه و کرک مسافرت طریقہ بولسون جمله سی حقنه حق قضاسی موجوددر . لکن بر قضانک بدایت محکمہ سی دیگر قضاہ اقامت ایدن مدعی علیہ محکمہ سنہ دعوت ایدهرک اوده بالاجابه محاکمه مبادرت ایدلیکنده مدعی علیہ کافه مدافعاتدن اول کنديسی دیگر قضاہ مقرر اولغله استدعانک ردینی طلب ایدنجه محکمہ مدعی عمومی بعد الاستماع اصول محاکمه نیک ۱۸ و ۴۹ ماده لرینه مبنی دعوی رد ایتکه مجبوردر .

بو حالده قضانک مکان ایلہ تقیدندن صلاحیت مسئله سی تولد ایدر . بر محکمہ کنديسنه عرض اولنان دعوانک رؤیتی صلاحیتی داخلنده اولوب اولدینگی رأساً نظراهميته آله ماز . مدعی علیہ سرد اعتراض ایلر ايسه او حالده اتخاذ قرار ایتکه مجبوردر .

ایمدی هر دعوی مدعی علیہک اقامتکاهی محکمہ سنده کورلمک لازم کلیر . یوقسه مدعینک اقامتکاهنه اعتبار اولدینگی کبی مدعا بهک بولندینی موضعه دخی اعتبار یوقدر . مدعا به ولوکه عمار اولسون . بناءً علیہ مدعی علیہ منسوب اولدینگی محکمہ نیک غیرینده محاکمه اولسی خصوصنه مجبور ایدیله من . مدعی علیہ مدعینک دعواسنی دفع ایلہ سلامت نفسی طالب و برات ذمت دخی اصل اولدینگی حالده خصمی مدعی علیهدن بر حق آلفه و مشغولیت ذمتی اثبات ایتکه راغبدر . سلامت نفسی و برات ذاتی طالب اولان طرفک عننده مستدعینک ایتدیکی ، حاکم حقنه بر شبهه سی و او حاکم خصمنک حقسنر دعواسنی میدان ثبوتہ ایصاله خادم اولور ملاحظه سی بولنقی اعتبار ایلہ مدعی علیہک آرزوسنه مراعات ، عکسینی ادعا ایدهرک فکرینه نماشاتدن راجح اولور .

قضانک مکان ایلہ تقیدی خصوصنده اصول محاکمه نیک وضع ایتدیکی احکام مجله نیک تأسیس ایلدیکی احکامه مبین کی کورینور . اصول محاکمه نیک ۴۹ نجی ماده سی موجبنه صلاحیت ادعاری مدعی علیہ جانبندن درمیان ایدلدکه محکمہ رأساً احداث ایدهر من . مجله نیک ۱۸۰۱ نجی ماده سی اقتضاسنجه بر قضا محکمہ سنک دیگر قضاہ اقامت ایدن اشخاص حقنه حق قضاسی اوله ماز . بوصورتده بر قضا حاکمنک بشقه قضاہ مقرر کیمسه علیهنه اعطای حکم ایلمی اصول محاکمه ایجابجه عند عدم الاعتراض صحیح و مجله اقتضاسنجه باطل اولور .

محکمہ تمیز بو ایکی ماده یی توفیق ایدهرک مقررات اتخاذ ایتشددر . شویله که بر قضا محکمہ سنه بالمراجعه دیگر قضا داخلنده اقامت ایدن شخص علیهنه استدعا ویرلدکه ، مدعی علیہ علی الاصول دعوت ایدیلور . اجابت ایدنجه قضاسی داخلنه علی طریق المسافره کیرمش و محکمہ حق حاکمیتی اکتساب ایش اولور . بوندن صکره مدعی علیہ صلاحیت ادعاسنده بولنور ايسه اصول محاکمه یه توفیقاً دعوی رد وسکوت ایلر ايسه اقتضا ایدن حکم اعطا اولنور . لکن مدعی علیہ محکمہ نیک دعوتنه اجابت ایلدیکی تقدیرده مدعی علیہ محکمہ نیک دعوتنه بالمطاوعه عدم صلاحیت ادعاسنده بولندینی بهانه سیله محکمہ ، عندالغیاب اعطای حکم ایلیمه من . بغدادده

اقامت ایدن بر شخص علیهنه درسعادت محکمہ سنده اقامه دعوا اولندیننده او مدعی علیہ بالذات کله یاخود وکیل کوندرمه مجبور ایتک خصوصنده اصلا عدالت یوقدر . بومعامله مدعی علیہ حقنه ضرر عظیمی مستلزمدر .

بعض محاکم ، مدعا به عمار کنیدی دائره سی داخلنده اولنجه مدعی علیہ دیگر قضاہ مقرر اولسه دخی رؤیت دعوی کنديسنی صلاحیتدار عد ایلور . بو ايسه مجله نیک ۱۸۰۷ و اصول محاکمه نیک ۱۸ و ۴۹ نجی ماده لرینه مخالفدر .

دائرہ حکم و صلاحیتلری متحد ایکی محکمہ آره سنده صلاحیت دعواسی نظر اعتباره آله ماز . شویله که : دائرہ حکم و صلاحیتلری متحد متعدد محکمہ لر موجود اولدقده مدعی ديله دیکی محکمہ یه مراجعتده مختاردر . بو صورتده مدعینک اختیار ایلدیکی حاکم ترجیح اولنور . زیرا مدعی منشی خصومت اولغله دیلدیکی محکمہ ده انشای خصومت ایتکه مختاردر . بو محکمہ ده انشای خصومت ایتکه دیگر محکمہ ده اقامه دعوی ایت دینله من .

درسعادتده برنجی و ایکنجی حقوق نامیه ایکی محکمہ واردر . هر برینک دائرہ حکمی و وظیفه لری متحددر . بو تقدیرده بر مدعی درسعادتده اقامت ایدن بری علیهنه برنجی حقوق محکمہ سنه بالمراجعه اقامه دعوی ایتدکه مدعی علیہ کافه مدافعاتدن اول بو دعوانک ایکنجی حقوق محکمہ سنه حواله سنی استدعا ایتدکه محکمہ بوطلی نظر اعتباره آله ماز . ع . حیدر

حکمت صفحہ

قواعد حقوقیه نیک منشائی

قواعد حقوقیه نیک منشائی ، درتدر :

برنجیسی احکام شرعیه در . رسل عظام حضراتنک انسانلره تبلیغ بیوردقلری احکامدن بر قسمی معاملات دنیوییه عائددر . اقوام سالفه و حاضره بونلری قانون حکمنده طوتمشدر و یاخود قانونلرینی اشبو شرایعدن اخذ واستنباط ایتشددر . بوصورتله حصوله کلن حقوقه ، حقوق شرعیه دنیلور .

ایکنجیسی ، عقلدر . جناب حقک نوع بشره احسان بیوردینی عقل واسطه سیله حق و باطل ، استطاعت بشریه دائره سنده تمیز اولنور . بوراده کی عقلدن مقصد هر کسده بولنان ومدار تکلیف اولان درجه سی دکلدر . بلکه من طرف الله مکمل و ممتاز بر صورتده یارادلمش ارباب بصیرتک وعقول سلیمه اصحابنک عقلیدر . بوصورتله حصوله کلن حقوقه ، حقوق عقلیه وفطریه کی ناملر ویریلور .

اوچنجیسی ، عرف وعادتدر . هر ملکته شرائطی جامع اولان عادات مرعی ومعتبردر .

در دنجیسی، قوانین موضوعه در که هر مملکتده حائز صلاحیت بر هیئت طرفدن وضع اولنور.

بو ایکی صورتله حصوله کلن حقوق دخی حقوق موضوعه تعبیر اولنور.

بناءً علیه حقوق، منشائی اعتباریه اوچ درلودر: حقوق شرعی، حقوق عقلیه، حقوق موضوعه در.

حقوق عقلیه — فطرت بشریه در مرکز و انسانک وجودیه قائم اولوب عقل سلیم ایله ادراک

اوله بیلن حقوق در.

حقوق عقلیه ایکی درلودر:

برنجیسی، حقوق ذاتیه در که انسانک اوصاف ذاتیه سندن متولد و مجرد نوع بشردن بولنق حیثیه

حائز اولدینی حقوق در. حیات، مصونیت، مساوات حقاری کبی

ایکنجیسی، حقوق تالیه و یا عرضیه در که مقاصد و احتیاجات بشریه نتایجندن اولان حقوق در. حق تملک

و تصرف و مدافعه مشروعیه کبی

حقوق عقلیه، علم حقوقک جهت نظریه سیدر. حقوق موضوعه آنک تطبیقاتیدر. حقوق عقلیه اصلدر

حقوق موضوعه آندن مقتبسدر. کرچه حقوق عقلیه افراد بشریه نیک برلکده یاشا سنده کی مقصدی تأمین

و افراد بشریه دن هر برینک ترقی و رفاهیتی استحصاله کافی ایسده بر طرفدن عقول متفاوت اولوب هر کس

بر صورتده دوشونه من. منفعت حقیقه یی ادراک ایده من؛ محافظه انتظام و اسایش، افرادک عقل و رویتیه ترک

اوله ماز. دیگر طرفدن حقوق عقلیه نیک وجداندن بشقه قوه مؤیده سی یوقدر، بوده محافظه انتظامه کافی

دکدر. انک ایچون هیئت بشریه یی اداره ایدن حکومتلر حقوق عقلیه یی مملکتلرینک احوال خصوصیه سینه

و منافع عمومیه سی ایجاباته کوره تنظیم و موقع اجرایه وضع ایدرلر. اشبو قواعد موضوعیه رعایت ایتمیلر

حقنده جزا ترتیب ایتمک صورتیه ده قوه تأییدیه وجوده کتیریلور.

مع مافیه حقوق عقلیه، حقوق موضوعه شکله کیرمکه ماهیتی تبدل ایتمز و عمومیتیه خلل کلز. مثلاً حیات

و صحت حق موجبجه بتون انسانلرک یشامغه و قوای جسمانی و روحانیه سی صحت و سلامته محافظه ایتمکه

صلاحیتی واردر. بونلر جناب حقک انسانلره لطف محض سبحانسی اولمغه کیمسه نیک انلری اخلاص

صلاحیتی اوله ماز، حتی انسان کنیدیسی بیه بو حق ترک و فراغ ایده من.

ایشته بو حق حیاتی محافظه یه عائد وظیفه لرینی حکومتلر، قوانین ضبطیه وعدیه وضعی و پولیس و ژاندارمه

مثلاً مأمورلر تعینیه صورتیه ایفا ایدرلر. تعیین مجازاتده مجرملرک صحتلرینی اخلاص ایتمه کی نظر اعتباره

آلرلر. عملیه نیک وجودجه مضرت کوره جککری درجده چالیشدیرلما سی حقنده مقررات اتخاذ ایدرلر

مأکولات مضره فروختنی منع و علل ساریه نیک انتشارینه حائل اوله جق تدابیری استکمال ایدرلر، اتحار

تشبثنده بولنلری تعذیر و کیلرده، یوللرده داعی مخاطرات احوالی ازاله ایدرلر. هواسی و خیم حملرده قریه

تأسیسنه، فابریقه و ده پولرک صحت عمومیه یی اخلاص ایده جک بر طرزده انشاسنه مساعدیه ایتمزلر. ایشته بونلر

هپ انسانلرک حیات و صحتنی محافظه ایچون اتخاذ ایدلش تدابیر اولمغه حق حیاتدن اخذ اولنمشدر.

مساوات دخی، بر درجده و بر حالده بولنان اشخاص حقنده سباق واحد اوزره معامله ایتمکدر.

انسانلر یارادیلشده هپ بر درلر. هم ماده و هم منأ حیواناتدن ممتاز بر نوع اوله رق یارادیلشدر.

ماده امتیازلری حیواناتده متفرقاً موجود اولان قوتلرک انسانلرده اکمل وجوه اوزره جمع ایدلمسیه در.

معناً امتیازلری کلیاتدن جزئیاتی استنباط و جزئیاتدن کلیاتی استخراج اقتدارینی حائز اولملریله در. انسان عقلیه

اشبو کائناتده بر انتظام موجود اولدینی کلار، مخلوقات ییننده بر مناسبت بولندینی ادراک ایدر. فطرت

بشریه در ترقی و اکتساب کالاندن خاصه سی واردر؛ مخترعات و کشفیات بونی اثبات ایلر.

ایشته انسانلر هپ بر نوعدر. بوصفیلرده فطره مشترکدرلر. یینلرنده من جهتله خلل فرقی یوقدر.

سائر حیواناتدن مابه الامتیاز اولان وصفیلرده اشتراک تاملری واردر.

کرچه انسانلر ییننده من جهة اللون فرق واردر. ابیض، اصفر، احمر، اسود دیه درت عرقه انقسام

ایتمشدر. لکن بوجهتمه کی فرقلری بشقه نوعدن اولملرینی مستلزم دکدر.

کذا انسانلر ییننده غنا، علم، تمدن جهتلریله در فرق واردر. بوده تربیه و معیشتک نتیجه سیدر. اما

انسانلرده فرقلری اولیوب حقوق و وظائف جهتیله جمله سی مساویدر.

وضع قانون خصوصنده قادین، ارکک، صغیر کی افراد بشریه حقلرنده امثاللرینه کوره معامله اولنمی

نظر اعتباره النور. احکام قانونیه ضعیف و قوی، فقیر و غنی جمله حقنده مساوات اوزره تطبیق اولنور.

حقوق عقلیه، فطرت بشریه ده بالقوه موجود و انسان ایله قائمدر. انک ایچون نفس الامرده لایتغیردر

زمانک تبدلی و اما کنک تغیریه دوچار تغیر اولماز. لکن صورت تفهمنده تفاوت حصوله کیر. چونکه عقل،

تجربه ایله و تلاحق افکار ایله قابل ازدیاد و اتساعدر. نصلکه چو جقلرده مبدأ نطق، فطره موجود اولدینی

حالده سوز سولیکه و سولیلان شیلری اکلامغه مقتدر اولیوب سنلرینک ایلر و لمسیه متناسب اثار ابراز ایدرلر.

بوسیدن انسانلر، حقوق عقلیه یه قوای معنویه لرینک توسعی و ترقیات تدبیریه لرینک مساعدیه سی مرتبه سنده

اکتساب و قوف ایتمشدر، هر وقت بشقه یولده اکلامشدر و اکلا دقلرینه کوره معامله ده بولنمشدر. آنک

ایچون حقوق عقلیه اوروپا ایله آسیا و افریقا ده بر اولدینی کی اوروپانک بوگونکی حقوق عقلیه سیله بیک

سنه اولکی حقوق عقلیه سی بر دکدر. اخلاقه، احتیاساته و علوم و فنونک ترقیسنه کوره دیکشمشدر.

حقوق عقلیه ایله حقوق موضوعه ییننده وجوه ایله فرق واردر:

اولاً، حقوق موضوعه رعایت مجبوریدر. رعایت ایتمیلره مجازات ایدیلور. حقوق عقلیه نیک ایسه

وجداندن بشقه قوه مؤیده سی یوقدر. حقوق موضوعه شکلی النجیه دکن حکمی وجدانده قالب عدم

رعایتی موجب مسؤلیت اولماز.

ثانیاً، حقوق عقلیه عمومی در. فطرت بشریه در مرکز اولمی حبسیله بالجمله افراد بشریه یه شاملدر.

حقوق موضوعه ایسه هانکی حکومت طرفدن وضع اولنلش ایسه انک مملکتنده جاریدر بشقه مملکتلرده کی

اشخاصه صورت مطلقه ده تأثیری یوقدر.

ثالثاً، حقوق عقلیه نفس الامرده مطلق و لایتغیردر. حقوق موضوعه ایسه احتیاجاته و ترقیات فکریه یه

کوره دیکشور، هر دولت لزوم کوردیکه قانونلرینی تبدیل ایدر «ازمانک تبدیلیه احکامک تغیری انکار

اوله ماز.»

حقون جزاي

بر نظرية قانونيه

دوائر استنطاقيه وهيئات اتهاميه ي تشكيل ايدن تحقيقات حاكمينك معفويت قرارلري اعطاسنه صلاحيت قانونيلري وارميدر؟ يوقيدر؟ مسئلهسي اوتهدنبري جزائيون بيننده متخالف مطالعهل سرديله موضوع بحث ومقال اولقمده در .

معلوم اولديني اوزره؛ دوائر تحقيقيه نك مقرراني، ايكي نوع قانونيه انقسام ايدر. كرك مستنطقرك وكر ك هيئت اتهاميلرك قرارنامه وضبطنامهلرنده اجراقلنان تحقيقات وتدقيقانه استناداً مظنونعليهك اجرائي محاكمهسي لازمكلوب كليجكي نقطهسي تعيين ايديلور. اكر مستنطق ويا هيئت اتهاميه، مظنون عليهك اجرائي محاكمهسنة لزوم اولديني فكر ومطالعهسندده بولنش ايسهلر منع محاكمه قرارنامه ويا مضبطهسي تنظيم واعطا ايدرلر. اكر محاكمهك اجرائي لازم كلهجكنه قائل اولمشرايسه لزوم محاكمه قرارنامه ويا مضبطهسي ويررلر. اصول محاكمات جزائيه قانوننك (٢٠٣) نجى مادهسي ايجانجه هيئت اتهاميه دلائل وامارات واقعهك مدار اتهام اولابيلهك درجده اولوب اولديني نظر تدقيقدن كچورمزدن اول فعل مدعا بهك رويي كندى وظيفه قانونيهسي داخلنده بوللوب بولنديغنه قرار ويرمك لازمه دندر. زيراكه وظيفه مسئلهسي عموم هيئات محاكم نزننده تقديمي مرعي طويلان مواد اساسيه دندر .

هيئت اتهاميهك مظنون عليه طرفدن ارتكاب اولنان فعلك جنائيت درجهسندده اولوب اولديني تدقيق ايتسي اشبو ماده قانونيه اقتضاسندن بولنديغنه نظراً جرم واقعهك جنائيت درجهسندده اولوبنده مرتكبي معذور ويا معفو اولديني تقديرده هيئت اتهاميهك اولبابده قرار اعطاسنه ماذونيت قانونيهسي وارمي؟ سؤالي وارد خاطر اولور .

بوسؤاله جواب ويرمك ايجون اول امرده معفويت ايله معذرت قانونيهك ماهيتي وقانون نظرنده يكديكردن فرق تفاوتى ايضاح اولنديركه اكلاشلسون .

جزا قانوننك (٤١) نجى و (٤٢) نجى و (١٧٦) نجى و (١٨٧) نجى و (٢١٦) نجى مادهلري مطالعه اولنور ايسه كوريلوركه؛ بر فعل جنائينك قانوناً معفو طوتلسي يعنى هيچ بركونه جزا ايله مجازات اولنامسي ايجون مواد مباحوث عناده معين اولان افعال وحالات مثللو اساساً مجازات مرتبهني محو ايدن احوال و كيفياتك وجودي لازمه دندر كه شومثاللر ايله معفويتك مقتضيات اساسيه وقانونيهسي ترتيب مجازاته محل بر اقامسيدر .

معذرت قانونيه كلنجه بونك دخي عناصر مركبسي قانون جزانك (١٨٣) نجى و (١٨٤) نجى و (١٨٧) نجى و (١٨٨) نجى و (١٨٩) نجى مادهلرنده تعيين ايديلان احواله مرتكب جرم على

طريق الاستثنا مجازات مقررده اساسيه دن اخف بر جزا ايله تاديب اولنور ايسده اسباب معفويتده اولديني كبي بالكليله مجازادن وارسته طوتلازكه بوتقدیرجه معفويت ايله معذرت بينندهكي فرق قانوني برينك حال مجرميت ومجازاتي بتون بتون محو ايتسي وديكرينك دخي مجازات واقعهني تخفيف ايتسي كيفيتيدر .

ايشته اساس مسئله بر طاقم تفكرات وملاحظات عنديه دن تعري ايديلهرك قانونك احكام وضعيه صريحهسنة ابتنا قلننجه موافق قاعده منطق بر نيجه عاده استخراجي آسانترين قضايدندر ظن ايدرزه .

چونكه ماده معذرت مظهر مجازات عد ايديلهرك قانوناً درجات متفاوته اوزره تاديبات ترتيب اولنش ومعفويت ايسه بركونه جزا تحت النيوب اساس جرمك وجودني احيا ايتكمده بولنش اولديغنه وديكر طرفدن انفاذ مجازات قضيه معتابهاسي محاكم عهدهسنة احاله اولنوب مستنطق وهيئت اتهاميلرك وظيفهلري جرائم واقعهك دلائل واماراتي جمع وترتيب ايله اتهامه مدار اولوب اولديغني تعيين وتديقدن عبارت بولنديغنه ومعاينك اساساً جرمك معفوديتي ايجاب ايتسيه دلائل واماراتك جمع وترتيبه واتهامه مدار اولوب اولديغني تعيينه محل اولهميهجغه عطف نگاه امعان اولنورسه كوزه چارپهچق بر نيجه حقيقيه ظهور ايدر كه اودخي انفاذ مجازاته مأمور اولان محكمهك ذاتاً مجازاته مظهر اولهميان معفويت مادهلرينه باققي كبي عثله اشتغال ايشيرلامسي فقط معذرت مادهلرنده اجرائي مجازات مقتضيات قانونيه دن اولمسيه بونلره متداثر جمع وترتيب اولهچق دلائل واماراتك ماهيته نسبتله ترتيب مجازات ايتسي خصوصندن عبارتدر . بناء عليه معذرت قانونيهني موجب اولان احواله اساساً اثر جرم بولنهرق فاعللرينك كلياً مجازادن بري اولاملري جهتيه بومقوله افلاك تقديري هر حالده محاكمه عائد بولنديغني حسيه مستنطق وهيئت اتهاميلرك اساس ماده حقنده قرار قطعي ويرملري جائز دكل ايسده قانوناً معفويت جزايي مستلزم اولان احواله مادام كه اساساً بركونه مجازات يوقدر . بومثللو مواد جزائيهك محكمهيه سوقى نهدن لازم كلسون ؟

بونك ايجوندر كه معفويت مادهلري مستنطق وهيئت اتهاميلر طرفدن تحقيق وتديق وتقدير اولهرق اكا كوره قرار ويريلور .

مستنطق ايله هيئت اتهاميلر بر فعلده اثر جرم كوره مدكلري حالده افعال ممنوعدن اولديغنه قرار وبره بيله جكلري كبي افعال واقعهك معفويتدن طولاي جزايي مستلزم اوليان افعاله دخي كذاك اعطاي قرار ايدده بيلور . تشريحي صددنده بولنديغمز معفويت ايله معذرت قرارلري حقنده افكار مؤلفين جزائيه شو مركز تفسير قانونيه دائردر . اما بوفكر ساله معارض اولان بر قسم علم حقوق اربابي قانوناً معفويت ادعا اولنان جرم واقعهك بر فعل منفرد ومستقل اوليوب مثلاً اثنای مهاجمده مدافعه وقوعبولوب بولماش اولديغني تدقيق ايلك افعال قتليه قانوناً ترتب ايدن احكام ومعايلاتك درجاتي تعيين ايتكم ديمك اولوب بونكه مسائل تطبيقيه دن اولمسه كوره تقديري محاكم وظائف اساسيه سندن معدود ايدوكنه ذاهب اولمشدردر!

نته كيم قانون جزانك (٤٠) نجى مادهسي موجبجه فاعلك حين اجراده سن وحالى فعلك نوعيتي تعيين ايتيهجكي جهته مستنطق وهيئت اتهاميهجه فعل مشتكا به اسباب مخففه نقطه سندن باقلميوب حد ذاته اعتبار ايدلك اقتضايدهجكنه نظراً صبى مراهقك قاتل معذور كبي محكمه جنائيه سوقى لازمه دن اولديغنه وباخصوص

بر مرتکب جرمک اثر فعلندہ کی مقصدینک مشروع اولوب اولدینی جہتلیزک تدقیقی مسائل تقدیر یه دن وبو صورت ایسه
حین محاکمہ تدقیق وحل اولنه حق مواد اساسیہ دن اولوب بومقوله احوالده تقدیر وقوعات مستنطق و هیئت
اتهامیه لک وظیفه قانونیه سی خارجنده بولدیغنه قائل اولمشلردر . وقتیلہ بوزمینده بعض مطالعات وارد وبرطاقم
مقررات لاحق اولشیدی . ینه اوزمان بز برائر قانونیده دیمشیدککه دوائر تحقیقیه وضع ید استدکری دعوائی
هر جہتدن رؤیت ایتک ، قانون جزا احکامنه هر وجهله تماس ایدوب ایتدیکنی تدقیق ایلک مجبوریتنده
بولدقلری ایچون مظنون علیک منع محاکمہ سنه ویا محکمه یه ارسالنه محل اولدیغنه دائر مستنطق ایلہ هیئت
اتهامیه نک ویره جکلری قرار نامه ومضبطلر انحق فعل واقعت تحقیقات جاریه دن متحصل نتیجہ کوره مظنون
علیه قابل اسناد اولمق اوزره نه جنایت ونه جنحه ونده قباحث تشکیل ایتدیکی وقابلیت اسناد مفقود بولدینی
احوالده اعطا اولنور .

تحقیقات حاکمکرینک جرائم واقعه نک تدقیق وتحریر سیله فاعللرینک تأدیب وترهیبی امرنده درجه مأذو -
نیتلرینی ووظیفه اتباع ایلہ مکلف اولدقلری اصول وقواعد کلیه یی تنصیص وتنسیق ایلان اصول محاکمات
جزائیہ قانوننک احکام مندرجه سندن مستفاد ومستبان اولدینی اوزره افعال جرمیه نک معفویتی مستلزم اولان
احوالده تلاحق ایدن مقررات شهادات واقعه ودلائل وامارات مستحصله نک ماهیتی وبونک معافیت قرار ی
اعطاسنه منتهی قوتی حائز اولوب اولدیغنک تعیننی اعتباریله امور تقدیریه یه تملق ایدہرک صرف مسائل
تطبیقیه دن عبارت دکلدر . بونک ایچوندرکه قواعد اساسیہ جزائیہ دن اولدینی اوزره کرک فاعل جرمک
صفت مجرمیتی ازالہ ایلہ فعل واقعه ترتب ایدن جزایک سقوطی وکرک فعل مدعا بهده کی وصف جرمک
احساسی صورتیله اولسون علی کلا التقدیرین مستلزم معفویت اولان احوالک عدم مسئولیت اسبابندن بولدینی
بدیهیدر .

بلکه عدم مسئولیت قرارلری مظنون علیک مجازات قانونیه دن وارسته قالمسنی منتج اولدیغنه کوره مسئولیت
جزائیہ نک فقدانی اعتباریله ده یکدیکنندن فرقی اولدینی طبیعیدر .

ایشته بونوع جرائمده تلاحق ایدن معافیت قرارلری ، دلائل وامارات موجوده وشهادات واقعه نک قوت وماهیتی
اعتباریله صرف هیئت محکمه نک تقدیر ایدہرکی قضیه لردن اولیوب جرم جنائی یه ترتیب وتطبیقی مقتضی جزائی
عفو واحا ایلہ بر صلاحیت قانونیه استعمالنی موجب وجهت قانونیه یه منتقل مقرراتدن بولنمسنه مبنی مستنطق
وهیئت اتهامیه لر احوال مماثلده قرار ویره بیلورلر .

طلعت

